

Nyuma Mwimpè Wakafidiibwa Bwa Cinyi?



Nudi numòna's, Mwaneetu Neville ùtu wìtabuuja ditentekelangana dya byanza.

Ndi mmòna ne ndi ne ndambu wa nkonko. Mpindyewu, nêngàngate yòyi eyi mààlabà dilòòlò, bwalu ncyèna ne díbà dya kunùkenketelayi dilòòlò edi to, pàmwápa mu Diyiisha dya dilòòlò dya ndekeelu. Mpindyewu, muntu yèyè ne lukonko pa kantu kanà kònsò kàà mu Diyiisha, ùlwe anu kuyitèeka dilòòlò kampànda, nenku mèmè ndi mwa kuyàngata dilòòlò didi dilondà.

² Mpindyewu, mààlabà dilòòlò ndi muswe kusangana, anyi, kupetakù ndambu wa bambi, kwòkù mushindu; kwòkù kakùyi mushindu to, ndambu wa balùme anyi bakàji, bimpè ne bashindàme batùdiku mwa kubìikidisha díbà dya twètù naabò dijinga, bwa ne bu. . .

Mààlabà dilòòlò tudi tubanga, paanyimà pàà Diyiisha, kutentekelangana byanza, nenku, bwa Nyuma Mwimpè. Ne pashiishe, nekwikalè. . . Wèwè udi ne dyèsè dya kushààla kaaba aka mene pawikalà ujinga nanku, mu diikisha dijimà, piikalàbi bikèngela ntàntà bule abu bwa wèwè kufwà. Ne pashiishe—pashiishe, kabìyi nanku to, wèwè ujinga kuyiila kwebe kumbelu, mona's, tudi bafwànyine kwikala ne disànka, bu wèwè mwa kubwela mu kaaba kampànda mùdi. . . Wèwè kùyi anu mumanye kwa kuya. . .

Tudi baswè kupetakù ndambu wa bambi, nombà yabo, piikalàbo beenyi; nombà yabo, mwaba wùdìbo basòmbèle, kutùdi mwa kubàpetelakù dyàkàmwè; nenku kwikala ne umwe mu díkù kampànda, umwe mu dikwabo, ne umwe mu dikwabo, bwa bààmòna mwa kunùpèesha dìleeja dya njila, nwènù biikalà mwa kukèba dibènesha dìnene ditùdi twamba edi abu, dibàtiiza dya Nyuma Mwimpè.

³ Makèèlèlè dilòòlò tuvwa twamba, “cìvwàYe.” *Nyuma Mwimpè Úvwa Cinyi?* Nenku twètù kusangana ne Úvwa anu pàmwè ne byònsò, bìvwà Nzambi mutùlayè abi. Uh-huh. Mu Yèyè twètù kusangana anu menemene cìvwà Ekeleeziya wa Nzambi mwa kwikala naaci dijinga. Twètù kusangana ne Yèyè ùvwa citampì, Musàmbi, diikisha, ne disànka, ne ditalala, ne dibìikà dya ku lufù. Ne cyònsò citù Nzambi mulaye Ekeleeziya Wendè aci, cidi cisanganyiibwa mu Nyuma Mwimpè.

⁴ Nenku mpindyewu, dilòòlò edi, tudi baswè kuyiisha pa, anyi kwakula pa, kulongesha pa. . . Ndi ne mabeji matwe ku asatu

anyi anaayi mwaba ewu a bidì bifùnda, anyi Mifùndu, pa Yèyè awu, mùdì. . . Makeelela dilòòlò mvwa mushiye Mukànda wànyì wà Cruden wa dipetangana dya myakù kaaba aka, kadi ncìvwa muwàngàte to. Kadi bìvwa bikèngela anu bwa mèmè kukenketa ne mwànyì mwònsò bwa kupeta Mifùndu leelu ewu. Mpindyewu, ne mààlabà. . . Dilòòlò edi tudi tulongesha pa: *Kiipàcìlà Kàà Nzambi Pa Kutùma Nyuma Mwìmpè Kàvwa Kàà Cinyi?* Yèyè ùdikù bwa cinyi? Pìikalàbi ne Yèyè ncintu cinène mushindu awu, dìbà adi Nzambi wàkaMutùma bwa cinyi?

⁵ Pashiishe, mààlabà dilòòlò tudi baswè kwakula pa ne: *Yèyè Ùdi Bwèbè Wèwè Anyi?* ne *Wèwè Udi UMupeta Munyi?* ne *Udi Umanya Munyi Paùdi UMupeta?*

Ne pashiishe, paanyimà pàà twètù bamanè kukenketa aci, ne Mifùndu, tucyùmvwijila ku Mifùndu, tukwàta mudimu ne Mifùndu bwa bintu byònsò, pashiishe aba bàdì bàkèba Nyuma Mwìmpè nebàlwe dìbà adi. Nenku dìbà adi ndi ntèkemena ne ditàbuluja nediikalè munkaci mwa kwenzeka, kubangila anu piine apu, bwa kutùngunuka dìbà adi ne Nyuma Mwìmpè.

⁶ Mpindyewu, bu mùdìbi ne mààlabà dilòòlò bààbùngì mbafwànyine kushààla ntàntà mu bibambalu mu ekeleeziya, ndi ndyumvwa ne bu twètù mwa kupetakù bambi bààbùngì ne bantu bàtùku balabùlèlèbùle dilombola dya bantu ku dipeta dya Nyuma Mwìmpè, bwa kubàkànkamikakù, bwa kuya kabwela mu nzùbu ne—ne mukàji ne bàyendè, anyi—anyi ne muntu kampànda udi ukèba Nyuma Mwìmpè, udikù mupetè bìmpè dìleeja dya njila pa cidi cikèngela kwenza.

Bu wèwè anu mwa kufilakù nombà webè wa tèlèfonè anyi mwaba wutùdiku mwa kukupetela kùdi mpaasàtà, dilòòlò edi anyi dilòòlò dya mààlabà. Mufilè anu kùdi Mwaneetu Neville cyanàànà, dìbà adi aci ncifwànyinekù kwenza bwa katùyì ne cya kudìsangisha bwa disangisha kampànda to. Fila wèwè anu nombà webè wa tèlèfonè cyanàànà kutùdiku bafwànyine kukupetela. Ne pashiishe ambà ne: “Nèngìikalèku, ne bu twètù. . . nwènù baswè kuntèèka mu nzùbu kampànda.” Byòbi ne m—mmukàji nkàayendè, dìbà adi tudi bafwànyine kutùma muntu mukàji, nwamònu’s, tumutùma kùdi yèyè mukàji awu. Ne pashiishe, byòbi ne mmu nzùbu mùdi muntu mulùme ne mukàjèndè, mòna’s, tudi bafwànyine kutùma mwambi kampànda.

Nenku tudikù bafwànyine kwikala ne disànkà dya kwikala neebe mu dikwàcishangana mu mudimu, bwalu ndi mumanye ne, muntu ne muntu, nudi bajingè cyòci eci, cidi citàmbe kwikala cya mushinga munene eci. Nenku vùlukàayi ne: “Ewu udi usùngila musùukà ku cilèma, mmubwikìdije musùmba wà mpekaatu.” Nwamònu anyi? Ne Mukàji—musela wa Kilisto ùdi ne nzala ne nyòòtà. Yèyè ùdi mu didìnyènga dya lulèlu, bwa kulela bàna bàà Nzambi.

⁷ Nenku mpindyewu, dilòòlò edi, kumpàlà kwa twètù kubala Mifùndù, twánjàayi kwinyikakù mitù yetu katanci bwa disambila. Kadi anu kumpàlà mene kwa twètù kusambila, nwènù bàdi ne mitù yenu miinyika abu, nudi bafwànyine kwikala ne dilòmba kampànda anyi? Elàayi anu byanza byenu muulu nwamba ne: “Nzambi, nyewu ngeela byanza byànyì muulu kakùyì tuseku to. Ndi ne dijinga. Ndi ndòmba bwa Ùngambùlwishèku, Éyì Mukalenge.” Nzambi àbeneshèku yònso wa kunùdi. Yèyè mmumòne byanza byenu abi. Banjelo báfundu malòmba àbò awu.

⁸ Nenku, Taatù wa mu Dyulu, nyewu tulwa mpindyewu, tuseemena cyàkàbìdì Kùdi mu disambila. Bamanyè kakùyì mpatà to, ne disambila dikaavwa dimanè kwenjiibwa munkaci mwa bânà bàà Nzambi emu dilòòlò edi, mu mwaba mukese ewu, ne misambu yikaadi mimbiibwe, ne tukàavwa babàndishe myoyi kuulu mu macyònkomoka a disànka bwa butùmbì bwa Nzambi.

⁹ Davidì wàkamba ne ùvwà mwa kubwela mu disangisha dya bansantu ne kumanyisha malòmba èndè. Kadi dilòòlò edi, nkwekù kùdi byanza byàbùngì. Míngà misangu, pàmwàpa, ndi mufwànyine kwamba ne, mbya pa lukàmà makumi mwandamukùlù bya bàdi basòmbe mu citanda emu dilòòlò edi bàdi beelè byanza muulu bwa malòmba. Bìdi bileeja, Mukalenge, ne katwènakù mwa kwikalakù katùyì Neebe to. Bikèngela twikalè Neebe Wèwè, ku ditùkù ne ku ditùkù. Wèwè ki wètù Mwoyi, dyetu disànka, bwetu bukole bwa mubidi, dyetu dikàndà didì ditùtwe mpàndà, cyetu cyeyemenu wetù, ngabu, ngabu wetù wa dikàndameena nendè mwena lukunà.

Nenku katwènakù anu bafwànyine kulwangana mvità ya mwoyi eyi katùyì Neebe to. Mbifwànyine kwikala bya kabiyiku mwa kwenzeka to nansha bishi bwa twètù kuyilwangana, ne bìdi bikèngela bwa twètù kwikala anu baKweyèmène mu byònsò. Bwalu, tudi bamanyè ne tudi twendela mu buloba bwa midimà ne bubwicidile. Ku luseke ne ku luseke lwònsò mwena lukuna mmutùcincimike, mu kwela kwa matèyì ne misùbulà. Tujila twètù, Mukalenge, ntùle tente ne matèyì a mwena lukunà, bwa kutùtònkola.

¹⁰ Ne twètù biine, peetu, tudi bamanyè ne, ku ndekeelu kwa njila tudi ne cibandabanda cile, cya mundidimbì cidi cibìikidiibwà ne ndufù aci bwa twètù kupicilamù. Éyì Mukalenge, udi mufwànyine kutùkwàtakù ku byanza ki nganyì dìbà adìs? Tudi baswè kuKumanya Wèwè mpindyewu, Mukalenge. Tudi baswè kumanya ne Wèwè udi mukwate byanza byetu, ne twètù bakwàte Cyebe cyanza, bwa twamònakù mwa kwikala ne ditwishiibwa didì dyele lwongò adi dya ne patwàfikà pa dìbà dinene dya ndekeelu dya mwoyi wètù adi, ku cibweledi cya ciibi cidi cibìikidiibwà ne ndufù aci, bwa twamònakù mwa kwamba pàmèe ne munsantu wa kale awu ne: “Ndi muMumanye

mu bukòlè bwa dibìikà Dyèndè dya ku lufù, ne ndi mumanye ne pààbiikilà Ye, nêmpatukè munkaci mwa bafwè.”

¹¹ Mpindyewu, Taatù Nzambi, tudikù baswè kulòmba bwa Wèwè kubènesha malòmba ètù ne didisangisha dyetu. Bèneshàku Mèyi Èbè. Ne bu mèmè mwa kwamba nî ncinyi nî ncinyi cya cifwànyine kwikala cibèngàngàne ne Diyì Lyebe anyi ne diswa Dyebe, Wèwè ucidi anu ne bukòlè bwa kumbwikidija mukana, muWàkenza mu bwinà bwa ntambwe pàvwà Danyèlè mwómù apu. Ne tudi tulòmba, Mukalenge, bwa Wèwè kukàngulakù maci ne myoyi dilòlò edi, bwa ne, ùjuulèmu nzala ne nyòòtà. Swàku bwa bóbò bàpetè nyòòtà mu mushindu wà kabàyikù mwa kupeta tulù anyi diikisha to, mwaba nansha wumwe, too ne pìikalà Musàmbi mulwe.

¹² Tudi biitàbùùje ne tudi ne mwoyi mu matùkù a ndekeelu, mu mundidimbi wà Dilwa Dyèndè. Ne kwòkù aku nkùdi Mayiisha aa maludikila, Mukalenge. Mbwa bantu kwikalabò babàwùle maci, bangàte didimwija. Ne swàku, dilòlò edi, tùumushè anu cizubu, anu patùdi twakulangana apa, tucitèèkè ku luseke lwà cibàsà, twamba ne: “Mukalenge Nzambi, mèmè ndi lupànzà Lwebe. Nyuma Webè àpaasalalèkù munda mwànyì. Mfwimbèku ùngenzè mùdi diswa Dyebe. Mèmè nèndekelelè mwoyi wànyì, dikàndà dyànyì, byònsò byànyì, ku bwalu Bwebe Wèwè.”

¹³ Tùmvwilèku, Mukalenge. Katwèna apa bwa kutùmònabò to, mu dilòlò dya mvula edi. Katwèna apa anu bwa ne tudi bapangè kukwabo kwa kuya to. Tudi apa mbwa kiipàcìlà kamwepele kakàyi kàà tuseku to, kansantu, kàà cijila mu myoyi yetu, nkàà ne, kuseemena pabwìpì Neebe, biikàle bamanyè ne Utu mulaye ne twètù baseemène pabwìpì Neebe, Wèwè neuseemenè pabwìpì neetu. Ne mbwà bwalu abu butùdi kaaba aka. Ewu udi ubwela mwikàle ne nzala kààkupàtuka ne nzala to. “Bàà dyàkalengèle ng’aba bàdi ne nzala ne nyòòtà ya bwakàne,” mwàkambà Yesu, “bwalu bóbò nebùùjiibwè.” Ne twètù tulòmba dyàmpà, katwàkupeta dibwe nansha. Ki ditwishiibwa ditùdi twètù naadi ndyòdi adi. Ne twètù balòmbè mushipa, katwàkupeta nyòka nansha. Kadi, Nzambi Taatù wetù neàtùdiishè ne Manà a mu Dyulu, Diyì Dyèndè ne Nyuma Wendè bìdi bìMufidila bujaadiki abi. Andàmùnàku ku masambila ètù, Mukalenge, ne ku malòmba ètù, patùdi batùngùnùke ne kuKwindila apa. Mu Dìna dya Yesu Kilisto mmutùdi tulòmba nunku. Amen.

¹⁴ Mpindyewu, nwènù bàdi munkaci mwa kufùnda Mifùndù eyi, bu nwènù mwa kubuululakù pàmwè naanyì cyàkàbìdi mu Yone Munsantu, nshapità wa 14. Tudi baswe kubangila ku nshapità wa 14 wa Yone Munsantu. Nenku túbangilàayi ku mvensà wa 14, Yone Munsantu 14.14, bwa kubala anu katùpà kàà Mufùndù ewu cyanàànà. Mpindyewu, mu cyòci eci nenùsangane dymvwija dyàbùngi dya bìndi muswe kwamba dilòlò edi.

¹⁵ Nenku vùlukàayi, nwênù bàdi ne Bibles ya màleetà makùnze ne, mbifùnda ne màyi makùnze, byòbì ebi. M'Méyi àdi Yesu Yéyè mwìne mwakule, pa nanku twétù tudikù mwa kushààla ne ditwishiiibwa ne nebiikalè anu mùdiYe mwambe amu. “Maulu ne buloba nebijiminè, kadi Dìyi Dyèndè kadyàkupangilakù to.”

Mpindyewu netùbalè kubangila ku mvensà wa 14 wa nshapità wa 14.

Nwênù balòmbe cintu kanà cyònsò mu dîna dyànyì, mèmè nèncyènzè.

Mulayi mubènesha kaayi's wè!

Nwênù bannangè, nùlamàayi mèyi àànyì matùma.

Ne mèmè nèndombè Taatù, ne yéyè neànùpèèshè Musàmbi mukwabo, bwa kushààlayè neenù kashidi,

Nyuma wa bulelèlà mene, udi bàà pa buloba kabàyi mwa kupeta, bwalu kabèèna bàmumòna to, . . .

Mpindyewu, nwênù bàdi baswè kubadila mu Bible wa cyena Ngelikà, nudi bafwànyine kucimwèna mwômò emu, kî . . . Kumòna mwômò amu mbwena kwamba ne “kuumvwa.” “Bwalu bàà pa buloba kabèèna bàMuumvwa to.” Aci ncilelèlà anu menemene. Ngánji ncibalùlùlèku mpindyewu.

Nyuma wa bulelèlà mene, udi . . . bulelèlà, udi bàà pa buloba kabàyi mwa kupeta, bwalu kabèèna bàmumòna, ne kabèèna bamumanyè to, kadi nwênù nudi bamumanyè (Nganyì? Musàmbi.) bwalu yéyè ùdi ùsòmba neenù mpindyewu (dìbà dya mpindyewu), . . . yéyè ùdi ùsòmba neenù, ne neikalè munda mwenu.

Yéyè ùdi cinyì? Musàmbi umwèumwè awu.

Ncyàkunùshùya kanùyi busàmbi to, mèmè . . .

Muntu kanà yònsò ewu mmumanye ne “mèmè” mmupinganyi muleeji muntu.

. . . mèmè nèndwe kunùdi.

Kadi katancì kakese, bàà pa buloba kabèèna bàmmòna kabidi to; kadi nwênù ne- . . . kadi nwênù nudi nummòna; bwalu ndi ne mwoyi, nwênù peenu nenuwikalè ne mwoyi.

Mu ditùkù adi nenùmanyè ne mèmè ndi munda mwa Taatù, ne nwênù munda mwànyì, ne mèmè munda mwenu.

Mwaba awu ngwikalà meeji àànyì mwa kwimanyina, kadi netùbalè tùpwekè kwìnshì ndambu. Ngánji mbalèbì cyòcì aci pààcì mpindyewu, cyàkàbìdì.

Mu ditùkù adi (ditùkù dinene, ditùkù dya cilumbulwidi), ditùkù adi nenùmanyè ne mèmè ndi

munda mwa Taatù, ne nwênù munda mwànyì, ne mêmè munda mwenu.

Ewu udi ne dīyì dyànyì ditùma, ne ùàlama, yéyè awu nguđi munnangè; ne ewu udi munnangè mêmè nebàmunangè kùđi Taatù wanyì, ne mêmè nēmmunangè, ne nēndimwènèshè kùđiye.

Yudà kumwambilayè, kàyi Mpongoloki awu to: Mukalenge, mmunyì mùđibi ne wéwè neùdimwènèshè kutùdi, kadi kakùyi kùđi bàà pa buloba?

Mbwena kwamba ne, *kosmos*, “ndongolwelu wa buloba.” Wéwè ne mēyì a kumpenga kwa dibèji, neùmone. Mwànyì mêmè cìdì “g” ne cìdì cyàmba apa ne, “*kosmos*, anyì ndongolwelu wa buloba.” Ng’ekeleeziya ayi, ne bikwabo byònsò, nwamonu’s.

. . . Mmunyì mùđibi ne wéwè neùdimwènèshè wéwè mwine kutùdi, kadi kakùyi kùđibo bóbò? Mmunyì mŪđi mwa kwenza nanku?

Yesu wàkandamuna e kumwambilayè ne: Muntu yéyè munnangè mêmè, yéyè neàlamè mēyì àànyì, (amen) ne Taatù wanyì neàmunangè, ne twétu netùlwe kùđiye, ne netwènzè cisòmbedi cyetu kùđiye.

Ewu udi kàyi munnangè kēna ùlama mēyì àànyì to . . .

Mmufwànyine kulama mēyì àđi ekeleeziya mwambè’s; kadi lama mēyì àđi Yè Yéyè mwambè, wamònu’s.

. . . ne mēyì anùđi nuumvwa aa kī ngàànyì mêmè to, kadi ngàà Taatù udi muntùme.

Maalu aa ngānwāmbidiwu, mpāncidì neenù apa.

Kadi Musāmbi, udi Nyuma Mwīmpè, wīkala Taatù mwa kutùma mu dīnà dyànyì awu, yéyè neānūlongèshè maalū ònsò, ne neānūvūlwijè maalū ònsò aa (mbwena kwamba ne, Mēyì Èndè), byònsò bīndi mēmè munwāmbile abi.

Mmu kiipàcìlà kaayì dībà adi mwàkatùminà Nzambi Nyuma Mwīmpè? Yéyè àswèkù àsakidilè mabènesha Èndè ku Dīyì Dyèndè.

¹⁶ Yesu wàkamba, ne: “Mu ditùkù adi nenùmanyè ne Mêmè ndi munda mwa Taatù, ne Taatù ùdi munda Mwànyì; ne nwênù nudi . . . Mêmè ndi munda mwenu, ne nwênù nudi munda Mwànyì.” Mpindyewu, bu ne tuvwa twamba nùnkù . . .

¹⁷ Mpindyewu, vùlukààyi ne, eci nebàcìkwatè pa mukàbà wà mēyì.

Mwena Kilisto kampànda mwena kantu-ku byanza, wa mu Louisville, mmumbiikilè kwēnjì katancì mwāmwa. Ne ùvwa wamba ne: “Mbibi be, Billy, mùđi Mayiisha aa, bu dya bwena diwāmbi màalabà dilòlò adi, kaàyikù àfika kùđi bantu binunu makumi anaayi muneemu emu to pamutù pàà bantu lukàma

ne makumi ataanu, anyi nkàmà yibidi, nkàmà yisatu mu kaatabernacle keebe kakese aku.”

¹⁸ Mêmè kwamba ne: “Mukalenge, mu ngondo yisambombo kuumukila ku mpindyewu, Yesu Yèyè munenge, buloba bujima’s nebàteelejè cyôci eci.” Nwamònu anyi?

Mikàbà ya mèyi ayi yìyaaya pa buloba bujimà, nwamònu’s, mu nyùngululukilu mwònsò. Nenku, ki bwa cinyi, tudi tulongesha kaaba aka mpindyewu anu citùdi twètù twitabuujà ne ki Bulelela, ne citùdi basangàne ne Nzambi mmutùshìndikìle ne m’Bulelela aci.

¹⁹ Mpindyewu, kiipàcìlà, mmu kiipàcìlà kaayi mùvwà—mùvwà Nzambi mutùmìne Nyuma Mwïmpè? Mpindyewu, ndi muswe kufùnda aci nanku, Yone 14, kubangila ku mvensà wa 14, ne kubala nshapità awu too ne ku ndekeelu, bwa cishìmikidi. Kiipàcìlà kàà Nzambi, mutùdi tusangana kaaba aka, mu kutùmà kwa Nyuma Mwïmpè, kàvwà nkiipàcìla kamwepele, mbwà Nzambi Yèyè mwine kusòmbela mu Ekeleeziya Wendè ne kutùngunukila ne mpàngù Yèndè mu Ekeleeziya.

Mbwena kwamba ne, Nzambi ùvwa munda mwa Kilisto, ùtùngunukila ne mpàngù Yèndè mu Kilisto; ùpàtuka mu Kilisto, ùbwela mu Ekeleeziya, ùtùngunukila ne mpàngù Yèndè mu Ekeleeziya.

²⁰ Mpindyewu, twàmanyi cidi Nyuma Mwïmpè. Twàjandùlù, makèèlèlà dilòòlò awu ne, Yèyè n’Nzambi.

Mpindyewu, patùdi twela meeji bwa Nzambi, Taatù, mùdi Yesu mwambè kaaba aka ne, n’Taatù Wendè; Nzambi, Mwànà, bu Yesu; Nzambi, Nyuma Mwïmpè, mutùdi tuMubiikila leelu ewu emu, mpindyewu, kì mbwena kwamba ne kùdi Nzambi bantu-nkààyà, misunguluke yisatu to. Mbwena kwamba ne kùdi Nzambi umwepele mu midimu yisatu.

Tucyàmbèku mushindu ewu. Cyònsò cìvwà Nzambi aci, Yèyè wàkaCìpòngolola mu Kilisto, bwalu yèyè wàkaDìshìya munda mutupù ne kuCìpòngolola mu Kilisto. “Ne Kilisto ùvwa kaabujimà kàà Bunzambi mu mushindu wà mubidi.” Cyònsò cìvwà Yehowah aci, Yèyè wàkacìpòngolola mu Kilisto.

Ne cyònsò cìvwà Kilisto aci, Yèyè wàkacìpòngolola mu Ekeleeziya; kaciyi mu muntu umwepele to, kadi mu Mubidi mujimà. Mwaba awu, mwaba wutùdi tudìsangìsha mu bwobùmwè, tudi ne Bukolè. Cyònsò cìvwà Nzambi aci, cìvwa mu Kilisto; ne cyònsò cìvwà Kilisto aci, cìdi mu nwènù.

“Bwalu Nzambi wàkavwìjibwa mubidi, ne wàkasòmbela munkaci mwetu.” Timòtè wa Kumpala 3.16, panwikalà nucìfùnda. “Kakùyì dikòkangana to bwalu busokoka bwa difwànà dya Nzambi mbunene: bwalu Nzambi wàkamwèneshiibwa mu mubidi, ne twètù twàkaMulenga ne

byanza. Nzambi, Yehowah, muvwijìibwe mubidi, ne mwendèle pa buloba, ne twètù baMumòne ne ètù abidi.”

21 Nudi bamanye’s, mu nshapità umwèumwè, wa Yone 14 awu, Filipò wàkamba ne: “Mukalenge, tùleejè Taatù, ne aci necitùsànkishè.”

22 Yesu wàkamba ne: “Nkàadi neenu ntàntà mule mushindu ewu, Filipò, kàdi wèwè kùyi uMmanya? Paùdi muMmòne Mémè, udi mumòne Taatù. Kadi bwa cinyi udi uNgambila ne: “Tùleejè Taatù?” Nzambi ùvwa muvwijìibwe mubidi.

23 Mpindyewu bwalu mbwòbù ebu. Taatù ùvwa Nzambi kumutù kwenu, mutùdi twamba. Twètù tudikù kubangila kacya ku Adàmà. Nzambi, Taatù awu, ùvwa kumutù kwa Mòsà ne bàna bàà Izaleela, mu Dikunji dya Kapyà. Pashiishe, Nzambi neetu, mu Kilisto; mwendàkàne neetu, muyiikile neetu, mudyè neetu, mulààle pàmwè neetu. Nzambi kumutù kwetu; Nzambi neetu; ne mpindyewu Nzambi munda mwetu. Cyònsò cìvwà Nzambi aci, cyàkabwela mu Kilisto; cyònsò cìvwà Kilisto aci, ncibwelè mu Ekeleeziya.

Ncinyi aci? Nzambi ùkwàcila mudimu munda mwebe. Mwaba kanà wònsò pa buloba wùdiYe muswe kukubiikidila awu, wèwè udi mwaba awu mene, ùkwàcila mudimu munda mwebe bwa kwenza diswa Dyèndè dîmpè. Mushindu mwine wùvwàbi bìkèngela bwa twètù kwelakù Nzambi twasàkidila bwa bwalu abu’s we! Nzambi, Nyuma Mwîmpè awu, mmutùmìbwe mu kiipàcilà kàà ne Nzambi ìkalè musòmbèle mu Ekeleeziya Wendè, ùkwàta mudimu mu cikondo ne cikondo cyònsò, ùkùmbaja diswa Dyèndè dya Nzambi.

24 Pàdi bantu bàkuseka wèwè apu, udibò bàseka awu kí ngwèwè to, bàdi bàseka Ewu udi mukutùme. Pa nanku Yesu wàkamba ne: “Nudi bàà disànka pàanwàmbà bantu bintu bibi bya mishindu yònsò, bya mafi, bwa Dîna Dyànyì. Nudi bàà disànka.” Ne, kabidi ne: “Bònsò bàdi ne nsòmbelu wa difwàna dya Nzambi mu Kilisto Yesu nebàkengeshiibwe.”

Bwalu, pààkaDimanyishà Nzambi mu Kilisto, bòbò’s bààkaMukîna. Mbanganyi bààkaMukîna, bya bibi? Ekeleeziya. Ekeleeziya ngwàkaMukîna, bya bibi. Bòbò mbààkaMukîna bibi kutàmba ne—ne bakwàciki bàà maalà. Bòbò mbààkaMukîna bibi kutàmba ne bakwabo bantu bònsò abu. Ekeleeziya ngwàkaMukîna. Pa nanku, ki bwa cinyi, panùdi numòna *kosmos*, “Ndongolwelu wa buloba, bàà pa buloba kabààkaMumanya to,” mbwena kwamba ne, “ekeleeziya,” wa ku dîna awu, “kààkaMumanya to. Yèyè wàkalwa kùdi bàà Kwabo, kadi bàà Kwabo kabààkaMwakidila to.”

“Kadi bònsò bààkaMwakidilà abu, Yèyè wàkabàpèesha bukolè bwa kulwa bàna bàà Nzambi, aba bààkiitabuujà Dîna Dyèndè abu.” Kaa, mushindu mwine wùvwàbi bìkèngela

bwa twètù kuMunanga ne kuMukuukwila's wè! Kiipàcilà kàà Nzambi, muswe bwa kulwa mu bwobùmwè!

²⁵ Mbyenze bu, kumpàlà kwa twètù kuumuka ku bitwàbadi abi, twànjàayi kukwata mudimu ne eci nunku; mu matùkù a Luutà, mu mukenji wa bupikudi, pàakashiyà Naòmi ditungà, bwa diteeta, bikondo bikolè. Kuyayè mu ditungà dya beena Moàbà, bàvwà anu civùmvù abu, beena Kilisto bàà ku dîna. Bwalu, beena Moàbà bàvwa bafùmîne ku mwânà wa bakàji wa Lotà, ne bôbô bàvwa beena kwitabuuja bàà ku dîna, ne basambàkàne. Ki pashùshe bayendè kufwàye, ne bânà bèndè bàà balùme babidi kufwàbo. Ki mu njila wa dyalukila kwabo, Naòmi . . . Luutà ne Naòmi, mu njila wa dyalukila kwabo awu, wendè . . . Umwe wa ku bakàji bàà bânà bèndè, Opà, kwambayè ne ùvwa muswe kwalukila ku ditungà dyèndè, kùdi nzambi yèndè, ne ekeleeziya wèndè, ne cisàmba cyèndè. Kàdi Naòmi kuteetayè bwa kwenzeja Luutà bwa kwalukilayè, kàdi yèyè wàkamba ne: “Cisàmbà cyebe ncisàmbà cyànyì. Nzambi webè n’Nzambi wanyì. Pawàfwila apu, ki pàngààfwilà. Pààkujiikilàbo apu, ki pànjiikilàbo. Nenku mèmè ncyàkwalukilàkù to.”

²⁶ Ki pàkaadi muntu mubàkùle lumònu mpòpò apu. Civwà cyèndè cisàmbà cyambè nansha ciikàle cinyì ne: “Wèwè's uyààya kuntwaku bwa kashààla munsantu mubùnguluki wa mu malaba anyì cintu kampànda.” Aci kacivwa ne civwàci cìshintulula nansha bwa Luutà. Kùvwa kiipàcilà kàvwà Nzambi muswe bwa kuulakù.

²⁷ Ne anu mùdi cya bushuwa ne nzala ya Nyuma Mwimpè dilòlò edi amu, ncintu kampànda munda mwebe, ciikàle cikòka, bwalu kiipàcilà kampànda kàà Nzambi mu nsòmbelu webè bikèngela bwa kàkumbajiiwbè, anu mwàkadìbi bwa Luutà amu.

²⁸ Bwalu-bulonda ebu's mbulenga bulayà! Ncyèna anu mwa kuumukakù to, bwa katanci. Nwènu's nudi bamanyè mukenji wà bupikudi, wà ne pàvwà Boàzà- . . . Nudi bamanyè bwalu-bulonda bwa mùvwà Luutà ùpumbulula mu budimi amu ne mwàkalengeleelàye Bowàzà. Ne kumpàlà kwa yèyè ewu kupetayè mushindu wà kumusèla, bìvwa bikèngela bwa kupikulayè byònsò bìvwà Naòmi mujìmije. Ne umwepele uvwakù mwa kupikula ngiikàdilù wa didìshinda wa Naòmi, mu mukenji wà bupikudi, ùvwa ncilongo cya mu dîsù; bìvwa bikèngela kwikalabò bilongo kumpàla kwa kupetayè mushindu wà kupikula. Ne yèyè nguvwa cilongo civwà citàmbe kwikala cya mu dîsù. Nenku bìvwa bikèngela bwa kwenzayè cimanyinu cya bantu bitwilàngàne, pambèlù pàà ciibi cya cimenga, anyì dijikula dya bantu bitwilàngàne dya ne yèyè nguvwa mupikùle byònsò bìvwà Naòmi mujìmije. Ki Bowàzà kucyenzayè pa kuvùla kwa cisàbaatà cyèndè kumpàlà kwa bakùlù, ne kwambayè ne: “Kwòkù kampànda mwab'ewu udi ne cintu kanà cyònsò cidì cya Naòmi, leelu ewu mèmè ngàcipikùlù.”

²⁹ Ne mushindu awu ki wàkenzà Nzambi, mulondè mikenji Yèndè Yèyè mwine. Nzambi kènàku mwa kulonda, kukupèèsha wèwè mukenji kampàndà bwa ùwùlondè kàdi Yèyè ùlonda wa cyanààna to. Yèyè ùdi ùlonda mikenji Yèndè Yèyè mwine. Pashiishe, Nzambi bwa kupikula ekeleeziya mujimine, buloba bùvwà bujimine, bufùki bùvwà bujimine; Nzambi, Yèyè udi kàyi ne mikàlù mu Nyuma awu, bwa kupikula bukwàbantu bùvwà bujimine, Nzambi wàkalwa Yèyè mwine cilongo, Muntu, Mwàna uvwaYè mufùke munda mwa Màriyà. Ne pashiishe kwenzaYè cimanyinu, anyi bujaadiki; pambèlù pàà biibi bya Yèlusàlèrà, Yèyè wàkabàndishiibwa pankaci pàà maulu ne buloba, ne wàkafwà, ne wàkapikula bintu byònsò. Ne mu kutùùkà kwa mashi, Yèyè wàkajidila Ekeleeziya bwa Yèyè mwine kusòmbelamù, ne kwenza bwobùmwè ne kuyiikilangana nendè, kaaba kàà bwobùmwè kàvwà kajimine kàà mu budimi bwa Edènà aku mùvwà Nzambi ùtùùluka dilòlò dyònsò, pa dībà dya kuya mu ekeleeziya.

Nukààvwakù bamòne anyi? Nzambi ùvwa ùtùùluka mu citaleela cya ditùku, pa dibwela dya dībà. Kùdi cintu kampànda pàkaadi bufùku bùbanga kwila, bantu bàdi bàtùma meeji ku ekeleeziya ne kùdi Nzambi; beena Kilisto. Paùdì umona dībà dibwela, wèwè udi umanya ne dyebe dībà dīdi pàadi munkaci mwa kubwela.

³⁰ Nenku mu citaleela cya dilòlò yèyè ùvwa ùtùùluka ne ùyiikilangana naabò. Kadi mwaba awu ki wàkajimijàYe bwobùmwè abu, bwalu mpekaatu kàvwà mwa kuMupèèsha mushindu wà kucyènza to.

Ki pashiishe kuvwijiiibwaYè mubidi ne kusòmbelaYè munkaci mwetu, bwa Wàmòna mwa kwalukila cyàkàbìdì kùdi muntu, ne kusòmbela mu muntu, ne kwalujulula muntu mu ngiikàdilù wa bwobùmwè Nendè cyàkàbìdì, ne kumupèèshulula bukenji bwèndè bufila kùdi Nzambi. Ki cyàkenzàYe ncyòci aci.

³¹ Ki kiipàcilà kàà Nyuma Mwìmpè nkòkò aku. N'Taatù, cyàkàbìdì, Nzambi Taatù ùsòmbela munda mwebe wèwè, ùkùmbaja mpàngù Yèndè, bwa kujikija mpàngù Wendè wa bupikudi; ùkwàcila mudimu munda mwebe, ùkuvwija mukwàci wa mudimu pàmwè Nendè; ùkupèèsha kaaba kampànda, ùkupèèsha cya dyenza bwa mwanèènù wa balùme ne mwanèènù wa bakàji bàdi badìshinde; ùkupèèsha Nyuma Wendè ne dinanga Dyèndè, bwa kuya kakèbangana ne bajimine, bu mwàkenzaYe mu budimi bwa Edènà. “Adàmà, Adàmà udi penyì?” Ki cìdì Nyuma Mwìmpè wènzela muntu mulùme anyi muntu mukàji ncyòci aci. PàdiYe anu ùfika mu mwoyi wèndè ne wàngata cisòmbedi Cyèndè, kùdi nyòotà ne nzala bwa misuùkà mijimine.

Ki lutàtù lùdiku leelu ewu ne masangisha ndwòlò alu. Kamwèna dilengiibwa dya kùdi Nyuma bùngi bukùmbàne to, bwa kuya kwenda kukèbangana ne misuuka ya bàdi bajimine ne

bàdì bàpùnga ne lufù. Mbitàmbe kwikala anu bwa kudìpetela luumù, anyì ekeleeziya, anyì citanda, anyì dingumba, pamutù pàà ndongamu wa dipeta dya misùùkà. Bya luse be! S'tudi bafwànyìne kushààlapù bikolè.

Nzambi wàkaDipòngolola mu Kilisto. Menemene.

³² Kilisto wàkaDipòngolola mu Ekeleeziya. Ki bwa cinyì, tàngilààyaaku mpindyewu: “Mu ditùkù adi nenùmanyè ne Mémè ndi munda mwa Taatù, ne nwènù nudi munda Mwànyì, ne Mémè munda mwenu. Mu ditùkù adi mmunwàcimanya.” Bwalu, bìdi ne, cintu cyònsò mu kaabujimà cidi nndongamu wa bupikudi udi utùuluka, Nzambi awu wàlukila bwa kusòmbela mu, ne kusòmba pàmwè ne, ne kuyiikilangana ne bantu Bèndè, mùvwàYe wènza ku cibangidilu amu.

Mpindyewu, dîbà adi, pàdìYe anu ne wàfikishì Ekeleeziya Wèndè mu ngiikàdilù ya dyakula nende, ùfikisha Ekeleeziya Wèndè pa kaaba kaa Yèyè mwa kupòngolokelamù, ne ùnanga, ne ùswishisha, ne wènza bwobùmwè, dîbà adi nekùlwe Edènà. Yèyè neàpingajè Ekeleeziya Wèndè mwaba wàkaMushilàYe—Yèyè, ùmupingaja cyàkàbìdì ku Edènà, mwaba wàkadishindilàYe awu. Yèyè, mpindyewu. . . Mwaba awu ki wàkenzelàYe dibanga Dyèndè dya ntwàdijilu, anyì cibulà. Mwaba awu ki wàlujiibwàYe cyàkàbìdì, mwikàle ne dibaya dyònsò dya kufùndila dya bupikudi dikùpula bìmpè, ùbààluja cyàkàbìdì buludì ku wòwò mwaba awu.

³³ Ekeleeziya ùdi pa buloba kùkaadi cikondo kampànda. Neku Ekeleeziya, mu bulelèlè, paanyimà pàà Dilongolola, dya bidimu cinunu ne nkàmà yitaanu bya bikondo bya mîdimà. . . Luther nguvwa mulongolodi wa kumpàla bwa kupàtuka paanyimà pàà cipungu cya bapostolo. Neku dîbà adi pààkapàtukà Luther, Nzambi wàkamacisha ndambu mukese wa Nyuma ne wàkaMupòngolola pa Ekeleeziya, mu dibingishiibwa. Ne pashìishe mu matùkù a Wesley, Yèyè wàkapòngolola ndambu mubàndile kakese wa Yèyè mwine, mu dijidiibwa. Neku pààlu cikondo kutùngunuka, too ne ku cikondo cya nshìikidilu, Nzambi mmutùngùnuka ne kuDipòngolola mu Ekeleeziya Wèndè. Kènzakanàayi anu ku nseke yònsò bwa numòne ní m'Bulelèlè, anyì ní kí mbwòbù.

³⁴ Tàngilàayi cikondo cya ba-Luthériens, nwènù bàdì bàbalà maalu-malonda, tàngilàayi ditàbuluja dyabo ne byàkenzàbo. Tàngilàayi mùvwà ditàbuluja dya Wesley ditàmbe bunene menemene, mùvwà bukolè bùvwàbo naabù butàmbidìle, kadi biikàle banyàabanyà. Tàngilàayi mu matùkù a Mpenta, ditàbulujà divwàbo naadi musangu awu, divwala bunene kaayi, dyalàbàle.

³⁵ Kabidi, *Mutùkùmbudi Wa Mu Dyàlumingu*, cibejibeji cya beena Katolike aci, citondè cyàmba ne beena Mpenta mbapàtùle bantu mùliyò mujimà ne binunu nkàmà yitaanu mu cidimu

cimwè bàdì bakùdimùne mucìma, benzè kutàmba ne ekeleeziya mikwabo yònsò misanga ntete. Katolike yèyè wàkashintula, wàkamba, anu bwa mùlìyò wumwe. Mu *Mutùkùmbudi Wa Mu Dyàlumingu* wabò bóbò biine awu amu, cibejibeji cìvwà cibìikidiibwà ne *Mutùkùmbudi Wa Mu Dyàlumingu* aci, bàvwa bambè ne beena Mpenta bàvwa babàtàmbe búngi.

Ne, vùlukàayi ne, dikudimwisha dya mucimà dya beena Mpenta adi òvwà ndikudimwisha dya mucimà dya bantu bùle tètè ne Nyuma Mwímpè. Biikàle banyààbanyà, ku mbangilu, kumpengà kwa kajila kampànda kwàka, biikàle ne cindaalà cya—cya kale. Ne bakàji kabàvwa mene mwa kupeta mushindu wà kusùmbakù nansha nshesheetè ya mu cifùka to. Bàvwa bàshààla mu njila ya njanja mwàmwa, bènda bàngulula matalà ne bààpela, ne bènzela bàna baabo balela mampà. Kadi mbikafikè ku cinyi? Ekeleeziya mutàmbe bukolè mwimàne pa buloba leelu ewu, kakùyì ku mèsù a bàà pa buloba to, kadi ku mèsù kwa Nzambi, bwalu Yèyè ùdì ùcìjaadikila ku bidìYe ùbènzela. Yèyè ùdì uDìpòngolola munda mwabo, ùCìpòngololamù.

³⁶ Mònaayi mpindyewu cìdì cyenzèke, Nzambi mwikàle uDìpòngolola munda mwabo. Mpindyewu Ekeleeziya mmufikè pa mwaba kampànda, kubangila ku Luther, Wesley, ne ditàbuluja dìdì dyènzeka too ne ku Mpenta; ne dibwelè mpindyewu mu cikondo citùdì tufika mpindyewu eci, ku Nyuma Mwímpè umwèumwè awu, cibi Yèyè awu mwikàle wabúngì kupita. Mpindyewu, ba-Luthériens abu pàakasùngidiibwàbo kale wàwa, bàakapeta citùpà cya Nyuma Mwímpè. Pàakajidiibwà ba-Méthodistes, cìvwa mmudimu wà Nyuma Mwímpè. Nwamònu's, cìvwa ncitùpà cya Nyuma Mwímpè. “Twètù katùyiku to bóbò kabèna mwa kuvwìjibwa bapwàngàne nansha,” mùdì Mifùndu yàmba. Nwamònu anyi?

³⁷ Mpindyewu, Nzambi, bu mùdì Bukènkè bubangè kukenkesha mu matùkù a ndekeelu, mMutèkèmène kutùdì twètù, cintu cinènè. Bwalu, “Kùdì byàbúngì bifidiibwe, ki kùdì byàbúngì bilòmbiibwa.” Pa nanku Yèyè nealombè byàbúngì menemene kutùdì twètù kutàmba byàkalòmbaYe kùdì ba-Luthériens anyi kùdì ba-Méthodistes, bwalu twètù tudi twendela mu Bukènkè butàmbe bunene, biikàle ne Bukole butàmbe, biikàle ne bujaadiki bunene. . .bu—bunene kutàmba buvwàbo bóbò naabù. Mpindyewu, tudi twètù ne bujaadiki bwa dibìishibwa dya ku lufù butàmbe bunene. Tudi twètù ne bintu bishìndàme, bya bitwìshìibwe kutàmba bìvwàbo naabì bóbò.

³⁸ Kadi bìdì anu mùmvwà mwambìle beena cilongelu citùmbùke cya ba-Luthériens, kì nkwanjì kwenza ntàntà mule to.

Bàvwa bàmba ne: “Citùdì twètù aba naaci ncinyi?”

Mêmè kwamba ne: “Muntu kampàndà wàkakùna budimi bwa matalà. Tubèji tukese twa kumpàla tùpàtuka, ki kwambayè ne: ‘Twasàkidila Mukalenge bwa dinowa dya—dya matalà!’ Mu mushindu mushààdile yéyè ùvwa naadi, kadi yéyè ùvwa naadi anu mu mmwènekeli wa ntwàdijilu cyanàana. Abidi mmale asatu mmîpi, kulwaci cikolakola.”

Ki munyamvudi kupàtukawù lwà kuulu aku, civwà ba-Méthodistes.

³⁹ Bu nwênù mwa kutàngila bufùki, nenùmonè Nzambi ùkwàta mudimu. Kùdi mùnsokòntù wùsanganyibwa muntwamu wùdi mene wùya pàmwè ne mudimu wányi wà bwambi. Nwamònu anyi? Bidi ne, panùdi nutàngila bufùki, numòna mùdibu bwèza, cikondo ne dîbà, nudi mwa kumòna mwaba wunùdi ne mwoyi. Tàngilàayi cikondo.

⁴⁰ Mpindyewu, dîbà adi, ba-Méthodistes, bôbò bàvwa minyamvudi. Bàvwa bàtàngila paanyimà kùdi ba-Luthériens, bàmba ne: “Twètù tudi ne dijidiibwa; nwênù kanwènaMù ne kantu nansha kamwe to.”

Abidi mmale asatu mmîpi, kuumukila ku bungungu abu, kuumukila ku ba-Méthodistes, kupàtukakù lutete lwà. . . kabèji kàà ditalà. Aci ki civwà Mpenta.

Ki bwalu mbwòbù abu, dibingishiibwa, citùpà cyàCì cimwè. Dijidiibwa, cikwabo citùpà cyàCì. Nyuma Mwimpè, cikwabo citùpà cyàCì; Mpenta. Luther, Wesley, Mpenta.

⁴¹ Mpindyewu Mpenta udi wèza cinyi? Ndi ncifwànyikija, bwalu, mu Mpenta, cyàkaaluja, kî ndibèji dibishi to, kî munyamvudi to, kadi. . .

Ditalà kadyèna mwa kwambila munyamvudi ne: “Ncyèna ne cya dyenza neebe” to. Anyi, munyamvudi kawèna mwa kwambila di—dibèji ne: “Ncyèna ne cya dyenza neebe” to. bwalu mwoyi wumwewumwe wùvwà mu dibèji awu ngùdi mwenze munyamvudi. Mwoyi wumwewumwe wùvwà mu munyamvudi awu ngùdi mwenze mwepu.

Ne ekeleeziya wa ba-Luthériens ngwàkenza ekeleeziya wa Wesley. Ekeleeziya wa Wesley ngwàkenza Mpenta.

Kadi, Mpenta, ùdi cinyi? Ndyalujulula dya lutete lwólù lumwelumwe lùvwà luyè mu buloba ku cibangidilu alu, lwikàle lwaluja kaabujimà kònsò kàà Bukolè bwa Mpenta, ku dibàtiiza dya Nyuma Mwimpè, nwamònu’s, mu matuku a ndekeelu. Kaa, s’ncintu cinènè cya dikèma’s, cya kutàngila, cya kwitabuuja ne kutàngila.

⁴² Mpindyewu mu cikondo citùdi twètù ne mwoyi mpindyewu eci, ncipite Mpenta.

Mpenta mmudîtèèke mu malongolodi, ne mubangè kutentula bikolè menemene malongolodi ne: “Twètù tudi *cikampànda* ne tudi *cikansanga*.” Aci’s cidi anu bufùki. Kanwèna anu

mwa kupanga kucyènza to. Mbufùki. Bôbò's nebàcyènzè. Cidi nndongamu, bwa bôbò kwenza nanku.

Kadi Ekeleeziya mmutùngùnùke. Mmubwelè mu bukole butàmbe bunene, butàmbe búngì. Ndyalujulula dya mapà.

Kàdi beena Mpenta bààbúngì kabèena bìtabuujya dyondopa dya kùdi Nzambi, mudimu wà bwambi wà Banjelo, ne makolè a Nzambi awu to. Beena Mpenta bààbúngì bàdi bàbìikila bikèènà-kumòna bìndì mèmè mmòna ebi ne, “ndyabùlù.” Malongolodi àbúngì kì mmaswe nansha kwikala naaCi bwalu to, mwine mu Mpenta amu. Nwamònu's, twètù tudi batentèmùke bayè bapite apu. Anu mùvwà ba-Méthodistes babìikile beena Mpenta ne, “mbapàle” amu, bwa dyakula dya mu myakulu. Anu mùvwà ba-Luthérians babìikile ba-Méthodistes ne, “mbapàle” amu, bwa dyela dya mbilà. Nwamònu anyi?

Kadi byònsò abi ndilwa dya Nyuma Mwímpè, mu nushindu wà ne Ekeleeziya munene ùdi munkaci mwa kuujiibwa tètè, ne kupacishiibwa patapata awu, aleluuyah, ne makolè manene a Nzambi wa Bukolè bwònsò. Mu mushindu wà ne, mmukafikè mu mwaba wà ne byenzedi mene byàkenzà Yesu abi bidi munkaci mwa kumwèneshiibwa mu Ekeleeziya mpindyewu. Tukàadi pabwîpi, balundà bàànyì.

⁴³ Ngǎnji ngìmanè kaaba aka, bwa katanci kakese cyanààna, bwa kupeta cìvwà Nzambi mutèèkèle Nyuma Mwímpè mu Ekeleeziya, nnupèeshèku cifwànyikijilu cikwabo bwa nùmanyè. Kale wàwa mu Dipungila Dikùlukulu, pàvwà mwà—mwànà . . .

Muntu ùvwa wènza dîkù dyèndè. Ùvwa ùsèla mukàjì, aci ki cintu cya kumpàla.

Pashìishe ùvwa ùlwa muntu munene, byenzè bu bulongolodi kampànda. Bìvwa bìmpè.

Cintu cìvwa cìlondà cìvwa cyènzeka, kùvwà kùlwa dilediibwa mu dîkù adi. Apu mpàdi Nyuma Mwímpè, nwamònu's, nyuma kampànda mukwabo ùbwelamù, ùvwa mwikàle mwànà wa balùme. Mwànà wa balùme awu, kàvwa mwambùle bujitu mu kaabujimà to, anyì kàvwa mupyànyi to too ne pàvwàye ùfika pa cipimu kampànda. Kadi bìvwa bikèngela bwa kwanji kushindikiiibwayè, dyàmbedi. Eyowa.

Ne pashìishe bàvwa ne mukenji wà ditèèkiibwa. Bwenu nwènù bambi, “dishikiibwa dya mwànà wa balùme,” kì dîndì ngamba mpindyewu edi, nwamònu's, pashìishe pàvwàye ùfika pa cipimu cya yèyè kutèèkiibwa. Yesu wàkafila cifwànyikijilu cilenga cya cyòci aci, pa Mukùna wà Dishintuluka dya mpàla.

⁴⁴ Anu mùngàmbì ne, Nzambi kàakuya pambèlù pàà mikenji Yèndè bwa kwenza cintu kanà cyònsò nansha.

Wèwè ne ciinà cya màyi a kazeeze pa aka kakùnà, cìfùkusha màyi mu lupeepèlè mwònsò, ne pa kakùnà kakwabo aka, wèwè mwikàle ne bya pa madimi munkaci mwa kuuminnyina, udi mwa

kushààla mwimane pa aka kakùna wela mbilà ne: “Kaa, wêwè mâyi, pwekèlà lwà kùneeku ùlè mu bya pa madimi byànyi! Kaa, wêwè mâyi, ndà mu bya pa madimi byànyi!” Kaàkuyamù to. Kadi wêwè ukwàta mudimu bilondèshile mikenji ya dikòkiibwa dya kùdi buloba, udi mwa kwela mâyi pa bya pa madimi abi.

⁴⁵ Wêwè ne mubèèdi mulàadika kaaba aka, anyi ngènzàmpèkààtù mulàadika kaaba aka, anyi muntu udi muswe kudìlongolola, udi kàyì mwa kulekela dinwà dya maalà, kàyì mwa kulekela dinwà dya mfwankà, kàyì mwa kulekela dyalakana ne bikwabo. Bu wêwè anu mwa kukwàta mudimu bilondèshile mikenji ya Nzambi, kwenza bwa Nyuma Mwîmpè àbwelè muntwamu, dìbà adi yêyè kàcyèna kabidi muntu wa yêyè mwine to. Yêyè, neimanyikè cintu aci, bwalu Nyuma Mwîmpè ùdi ùmwangata ku bukòokeshi Bwèndè. Kadi bìdi bikèngela bwa wêwè kukwàta mudimu bilondèshile mikenji ya Nzambi, tunungu twà Nzambi.

⁴⁶ Mpindyewu, mu Dipungila Dikùlukulu, pàvwà mwànà wa mu dibòko ewu ùlediibwa, bàvwa bàmutàngila, bwa kumòna mùvwàyè ùditwàla, diditwàla.

Dìbà adi taatù, mwikàle mwena kantu-ku-byanza munene mu ciine cikondo aci, pàmwàpa mwikàle ne bidimu bya mu makumi anaayi, anyi makumi ataanu, kàyì ne dìbà dya kolongesha mwànà awu to, yêyè mwine, pa nanku ùvwa wàngata. . . Mu matùkù awu kabàvwa ne tùlaasà twa bantu bônso mùdibo naatù mpindyewu emu to, pa nanku bóbò bàvwa ne cìvwàbo bàbìikila ne “ndeji,” anyi “mukoleshi,” mulongeshi wa kàlaasà. Nenku mulongeshi wa kàlaasà ewu ùvwa wa mutàmbe bwîmpè uvwayè mwa kupeta, mu mushindu wà ne ùvwa mwa kwikala mwambi wa bulelèlè ne wa wàmbila taatù awu bulelèlè pa bwalu abu.

⁴⁷ Ne pashìishe pàvwà mwànà wa balùme ewu ùfika pa cipimu kampànda, twàmbè ne, ùlwa mubobè. Mwànà wa balùme awu yêyè anu muntu mupidyè diitabuujà, kàyikù mwîmpè to, kàyì ùcyùka maalù a taatù to; cyèndè pèndè cyònsò cìvwàyè wèlela meeji anu kunàya ne bakàjì ne kulààla naabò, anyi—anyi kunwà kwa maalà, anyi kunàya kwa twarta twà mfrangà, anyi kwenza kwa manàyi a ditembangana a pa kabalù; awu mwànà wa balùme ùvwa misangu yònsò mufwànyine kwikala anu mwànà’s, kadi kàvwakù ushikikiibwa pa kaaba bwa kwikala mupyànyi wa byònsò bìvwà naabi tatwèndè to.

Kadi yêyè mwikàle mwànà wa balùme mwîmpè, ne mudìfile ku maalù a taatù, ne ùjaadika ne mmwànà mujaalàme, dìbà adi bàvwa bènza mushingà kampànda. Bàvwa bàpàtuka ne mwànà wa balùme awu mu mùsèsèsù ne bàmuvwàdika mùzàbì mutòòke, ne bàmushikika kuulu pa cibùmbà bwa beena mu cimenga bònso kumònabò. Bàvwa bènza fètè ne bàtwa cyanga, ne taatù ùvwa dìbà adi wènza mushingà wà ditèekiibwa. Ùvwa

ùtèèka mwanèndè mulela wa balùme awu mu mishinga yèndè sungasunga, nenku dībà adi mwànà awu ùvwa mulongo wumwe ne tatwèndè. Mu ngaakwilù mukwabo, bu ne bìvwa ndeelù ewu, dìnà dya mwànà awu pa kabèjì kàà shekè òvwa menemene anu mwomumwe ne dya papa wèndè.

⁴⁸ Mpindyewu tàngilààyaaku numòne cyàkenzà Nzambi. Pààkalediibwà Mwan'Èndè, WàkaMulekela ùkafika too ne mu bidimu makumi asatu, ùMuteeta, ùMupima. Pashìishe kuMupèèshaYè bidimu bisatu bya diteeta dikolè. Ki pashìishe paanyimà pàà diteeta dikolè adi, pààkamònàYe ne Mwan'Èndè ùvwa mudifile ku maalu a Taatù; Mukùnà wà Dishintuluka dya mpàla, Mukàndà wà Luukà; Wàkangata Peetèlò, Yakòbò, ne Yone, bantèmù basatu, ne Wàkabànda ku lusongo lwà mukùnà, ne kwòkù aku Nzambi wàkenza mikenji ya ditèèkiibwa. Yèyè. . . Bààkabàndisha mèsù ne bààkamòna Yesu, ne bìlàmbà Byèndè bìbàlakana biikàle bitòòke bu mukenyi wà mvùla. Ne pààkaMubwikilà Ditutu, ki Dìyì kupàtuka mu Ditutu amu, dyàmba ne: “Ewu m'Mwan'Àanyi munanga; nùMutèèlèjaayi Yèyè. Mèmè nèngìikalè mpindyewu musòmbe ncìciyi kabidi ne cya kwamba to. CìdiYe Yèyè wàmba aci ki mukenji ne Bulelèlè.”

⁴⁹ Mpindyewu ekeleeziya mmupicìle mu bilongelu abi. Mmubwele mu dibàkà kale wàwa, kùkaadi ntàntà mule, ne mulwe dìngumba, bulongolodi kampànda. Kadi, nudi numòna's, Dilediibwa nditwàle dyòdì cikwabo cintu kampànda. Kadi mpindyewu mmukafikè mu kaaba kàà ne ekeleeziya wa Mpenta, ne Dilediibwa dya cyàkàbìdì, mmuteeciibwe ne mwediibwe ku cipimu, kadi patùdì twakulangana apa ùkaadi ùfika pa kaaba kampànda. . . Nzambi kèna ùtàngila bwalu bwa Ekeleeziya anu bu bulongolodi nàka to. Kèna ùtàngila bwalu bwa Ekeleeziya bu ka—kasumbù kàà bantu nansha.

Ùdi ùtàngila bwalu bwa Ekeleeziya bu bantu-nkààyà, muntu-nkààyà mu Ekeleeziya. Kadi mpindyewu ùkadi mufikè mu cikondo. . . Ne cyòcì ciine kì mmùsokòntù to; tudi bònsò tucimòna. Pàdì muntu ùjaadika, ne Nzambi ùmunanga, Yèyè ùdi ùpàtuka nèndè mu mwaba kampàndà wà pàà Nkààyèndè. Kwòkù aku kumpàlà kwa Banjelo Yèyè ùdi wènza cintu kampànda bwèndè yèyè. Kwòkù aku Yèyè ùdi ùmubàndisha kuulu mu Bwikadi bwa Nzambi, ne ùmupàya ne mapà, ne ùmuuja, ne ùmushikika. Ki cikondo citùdì ne mwoyi ncyòcì aci.

⁵⁰ Nyuma Mwímpè umwèumwè wàkasungila ba-Luthériens awu, wàkajidila ba-Méthodistes awu, wàkabàtiiza beena Mpenta awu, ngudi utèèka mu bulongàme Dilwa dya Mukalenge Yesu mpindyewu awu. Dībà adi, neikalè ne bukolè bwa kanzèkelè, Mubidi awu, newùbwelè mu Cisumbù eci, Ekeleeziya, cyàkòkà bakwabo abu ne kubàpàtula mu lukità. Nekwènzekè dibìikà dya ku lufù. Ki bwa cinyi Nyuma Mwímpè ùdikù. Nyuma Mwímpè ncinyi? “Twètù katuyìkù bòbò kabèèna mwa kuvwijiibwa bapwàngàne to.” Bávwa ne mwoyi mu ditukù

kampànda, mu cyôci aci. Tudi twêtù ne mwoyi mu dikwabo ditukù.

“Mwena lukunà pààlwàye bu nkwaka, Mêmè. . . Nyuma wa Nzambi neàjuulè dìbëndelà bwa kumulwisha.” Nwamònu anyi? Tudi mu ditukù mpindyewu. . .

⁵¹ Kale wàwa, kabàvwa ne meeji matwè nansha mu cyàbibìdì cimwè cya leelu ewu to. Kabàvwakù mwa kwenza bômbè bwa mushinda anyi màshinyi a kadyendelandelà to. Kabàvwakù ne maalu a mamanya ne bikwabo mutùdi twêtù naabi mpindyewu emu to, kadi, anyi bintu bya kabiyi byùmvwika ebi to; bwa kuteeta kwamba ne muntu ùvwa mutaayike, ku lupwishi kampànda ne bikwabo, ne bènza ditaata kampànda ne bàteeta bwa kucijaadika, bwa kuvwija bantu bàlwa beena dyabùlù.

Kadi mpindyewu ewu, patùdi naaCì dijinga, Nyuma wa Nzambi ùdi ùjuula dìbëndelà. Ncinyi ciine aci? Yèye ùdi munkaci mwa kupòngolola Nyuma Wendè. Dìbà adi, aba bàdi biikishe mu nkità mwàmwa abu, anyi mwinshi mwa cyoshelu cya Nzambi, mùdi Mufùndù wàmba, bàdi bèela lubila ne: “Too ne ku dìbà kaayi, Mukalenge? Too ne ku dìbà kaayi? Too ne ku dìbà kaayi?” Nzambi mmungindile mêmè ne wèwè. Ekeleeziya mmungindile mêmè ne wèwè. Cikondo cya ditèekiibwa, pàdi Nzambi mwa kutùpòngolwela kaabujimà Kèndè, Bukolè Bwèndè, dibìikà Dyèndè dya ku lufù, bya Ekeleeziya ne Kilisto bàshààla bafwànàngàne mu mushindu wà Kilisto ùlwa wa ùmwèka ne mèsù munkaci mwetu, ne ùjuula bafwè, ne twêtù tuya mu Dyambwibwa.

⁵² Mpindyewu netwàmbè, netùleejè paanyima pàà katanci ne, anu aba bàdi bùle tètè ne Nyuma Mwîmpè ki bààya mu Dyambwibwa adi. “Bwalu bafwè bakwabo kabààkiikala ne mwoyi to munda mwa bidimu cinunu.” S’neya bushuwa. Anu bantu bàvwa bùle tètè ne Nyuma Mwîmpè ki bààkayà mu Dyambwibwa. Mpindyewu, Nzambi mmufile Nyuma Mwîmpè. . .

⁵³ Ndi ne mukwabo Mufùndù kaaba aka, mu Yone 14.12. M’Mufùndù wùdi bantu bônso mu tabernacle ewu bamanyè bîmpè.

Bulelèlà, bulelèlà, ndi nnewàmbila: Ewu udi ungiitabuuja mêmè. . .

Mpindyewu, kanùlekedikù mwakù awu “ungitabuuja” wùnùshiyisha paanyima nansha. Mu ekeleeziya wa ku dìnà, bàdi bàmba ne: “Eyowa, ndi ngitabuuja. Cya bushuwa, mêmè ndi ngitabuuja ne Yesu Kilisto m’Mwànà wa Nzambi.” Dyabùlù’s ùdi wìtabuuja cintu anu cyôci cimw cimwe aci. Neya bushuwa. Bible mmwambe ne ùdi wìtabuuja.

Kadi Mifùndù yìdi yàmba, mu Yone, ne: “Muntu nansha umwe kèna mwa kubìikila Yesu ne n’Kilisto, kakùyi ku Nyuma Mwîmpè to.” Wèwè, mu bushuwa bwa bwalu, ku Mifùndù. . .

Ngānji ngiïmanè ndambu kaaba aka, kumpàlà kwa kujikija kubala. Kwèna mukùdimùne mucìma paùdi kùyi mupetè Nyuma Mwímpè to. Aci ncyá bushuwa.

⁵⁴ Udi witabuuja “bwa.” Nyuma Mwímpè mmwakùle neebe, ne wèwè wâMujikulu patòòke. Dyabùlù ùdi ne cintu cimwecimwe aci. “Ndi ngiitabuuja ne Yèyè m’Mwànà wa Nzambi.” S’ki cidì dyabùlù pèndè wènza. Kadi wèwè udi wenda mutàngile kùdiYe.

Bidi ne, Peetèlò wàkabiikidiibwa ne kubingishiibwa, mu kwitabuuja Mukalenge Yesu Kilisto; ne mu Yone 17.17, Yesu kumujidila ku Dîyi, bwalu Dîyi òvwa Bulelèlà. Ne Yèyè nguvwa Dîyi adi. Kumpàla, Yone ùdi wàmba ne: “Ku cibangidilu kwàkadi Dîyi, ne Dîyi dyàkadi ne Nzambi, ne Dîyi dyàkadi Nzambi. Ne Dîyi dyàkavwijiiibwa mubidi, ne dyàkasòmbela munkaci mwetu.” Yèyè ùvwa Dîyi, pa nanku Yèyè wàkabàjidila. KwambaYè ne: “Taatù,” wàkula ne Nyuma uvwa munda Mwèndè, “Ndi Mbàjidila ku Dîyi,” Yèyè mwine, ku dibàtentekela dya byanza. “Dîyi Dyebe m’Bulelèlà.” Mwakùle anu nùnkù Pèndè kwikalakù, mu difù dya muntu mukàji; kaa, kabiyi mwa kwenzekakù to bwa kwikalayè mungà mushindu wà kaciyi bya Dîyi dya Nzambi diMumwènesha. “Ndi Mbàjidila.”

⁵⁵ Wàkabàpèèsha bukolè bwa kulwisha nyuma ya bukooyà. Yivwa yipàtuka. Wàkafùnda mènà àbò mu Mukàndà wà Mwoyi wà Mwànà wa mukooko. Ne Wàkabàtùma, Yone . . . Maatàayi 10, ne kubàpèèshaYè bukolè pa nyuma ya bukooyà; bààkiipata nyuma ya bukooyà, ne bààkenza byenzedi, ne bikwabo. Ne bààkaalukila, bènda bàsànka, kwambabò ne: “Nansha démons miine’s yivwa mitùkòòkèle.”

KwambaYè ne: “Kanùsànki ne bwalu démons mminùkòòkèle nansha; kàdi sànkayì bwalu mènà ènù mmáfùnda mu Mukàndà.” Ne Yudààsè ùvwa naabò. Mònaayi mùdiye mwa kwikala museemène pabwìpi; mupicìle mu dibingishiibwa, mukabwelè too ne mu dijidiibwa. Kadi wàkalejila bukènkè bwèndè mwaba kaayi? Wàkadileejila mwaba kaayi? Kumpàlà kwa Mpenta, s’ki kwàkaleejilaye civwàye.

⁵⁶ Tàngilàayi, nyuma awu neikalè ne kaneemu kakolè bwa ntèndeleeu anu mùdi bàdi bàdyùmvywa ne mbatàmbe bakwabo ne mwabo mwònsò abu, too ne mùdibi bikafika ku bwa Nyuma Mwímpè, pààbò bùmba bàMuumusha anu mwaba awu. Kì yèyè nyuma awu (kanwènaayikù mwa kumumòna anyi?) udi wenda ubànda, mufwilakanyi ne Kilisto awu. Ne Yesu wàkamba ne: “Yivwa mwa kwikala mifwànàngàne, mu matùkù a ndekeelu, mu mushindu wà bifwànyine kuseeswisha too ne Basungula mene bu ne bìvwa mwa kwenzeka.” Kàdi, vùlukàayi ne, anu Basungula mbààcimònà.

Nzambi ùtu ùbiikidila ku disungula. Wèwè, kwènàku ne disànka ne udi umwe wa kùdìbo anyi? Nwènù, bàdi kaaba aka dilòòlò edi aba, bu munùdi bamanyè ne cintu kampànda mu

mwoyi wènù amu cìdì cikòka ne: “Ndi muswe Nyuma Mwïmpè awu. Ndi muswe, Mukalenge, bwa Wikalè mu mwoyi wànyì”? Aci bwalu Nzambi mmufùnde dìnà dyebe mu Mukàndà wa Mwoyi wà Mwànà wa mukooko kumpàlà kwa difùkà dya dyulu ne buloba. Yèyè ngudi mwambe nanku.

“Muntu nansha umwe kèna mwa kulwa kùNdi,” mwàkambà Yesu, “pàdì Taatù Wanyì kàyì mumukòke dyàmbedi nansha. Ne yònsò udi ulwa kùNdi, Mémè némmpupèeshè Mwoyi wà Cyendeleele.” Mwoyi wà Cyendeleele ncinyì? Nyuma Mwïmpè. “Mwoyi wà Cyendeleele,” angàtaayi mwakù awu nuwùlondehè mu cyena Ngelikà, mmwambè ne, *Zoe*. *Zoe* n’Nyuma Mwïmpè. “Bònsò bàdì Taatù muMpèeshè nebàlwe kùNdi. Ne yònsò udi ulwa kùNdi, Mémè némmpupèeshè Nyuma Mwïmpè, ne Némmbùishè ku lufù ku ditùkù dya ndekeelu, Mémè nèncyènze,” mwàkambàYe. Kakwèna bya ne bu-ne-ne bwa Cyòci aci to. “Némmpupèeshè. Yònsò ulwàlwa awu; ne Ndi mmupèesha Mwoyi wà Cyendeleele.” Yèyè neikalè ne cya kubùika ku lufù, bwalu ùdi ne Mwoyi wà Cyendeleele. Ùdi ne cya kulwa. Yèyè kèna mwa kufwà to anu mùdì Nzambi kàyì mwa kufwà amu.

⁵⁷ Kaa, nwènù balundà bàànyì bananga bàà mu ditùnga dijimà emu ne mu kaacimenga kakese aka, bu ne mvwakù ne mushindu, anu ne dyànyì dīyì dya buntu edi, wà kunùbweja mu myoyi yenu amu musinga wà kupeta kwa dibàtiiza dya Nyuma Mwïmpè, civwa cifwànyine kwikala dibuulula dilenga dya dikèma dyùkaadiku mupetè mu nsòmbelu webè bwa kacypù. Pa kumòna cìdì . . . Wèwè’s udi ne cya kucyènza.

Ngǎnjì ntookeshèbi cyòci aci, pa ne: “Kwèna mukùdimùne mucimà to.”

⁵⁸ Peetèlò’s ùkaavwa musùngìdìibwe. Ùvwa mwitàbùùje Mukalenge, muMulondè. Yesu kumwambila ne yèyè ùvwa nganyì, kumwambila bwa kuMulonda. KumupèeshaYè bukòlè bwa kulwishangana ne nyuma ya bukooyà ne kumujidilaYè. Kadi paanyimà pàà byònsò abi, ne mulwè mwakudi wa musinga mukole bwa kasùmbù aku; mùdì beena Katolike bafwànyine kuswà kucibùikila ne, “mwepiskopo wa ekeleeziya, anyì paapà,” anyì cyònsò civwàku aci, muntu udi kumutù kwa ekeleeziya; kadi Yesu wàkamba, bufùkù bwa diMupàngila Dyèndè abu ne: “Udi muNnangè anyì, Peetèlò?”

Ki awu ne: “Mukalenge, Wèwè’s udi mumanyè ne ndi muKunangè.”

KwambaYè ne: “Dìisha mikooko Yànyì.” KwambaYè nanku misangu yisatu.

Ki Peetèlò kwambayè ne: “Wèwè’s udi mumanyè ne ndi muKunangè, mu mushindu wà ne nènye neeBè too ne—ne ku ndekeelu, ne nènye neeBè too ne ku lufù,” ne bikwabo.

⁵⁹ KwambaYè ne: “Kumpàlà kwa citààlà kusàmacì misangu yisatu, newikalè . . . kumpàlà kwa citààlà kusàmacì, newikalè

muMvilè misangu yisatu.” KwambaYè ne: “Kadi, Peetèlò, Ndi mukusambidile wêwè.” Tèèlejaayi. Abi kî mbyònsò to. “Ndi mukusambidile wêwè. Nenku paanyimà pàà wêwè mukùdimùne mucimà, dîbà adi wakànkamika bânà beenu.”

“Paanyimà pàà wêwè mukùdimùne mucimà.” Yèyè’s ùkaavwa mwelè mbilà. Ùkaavwa pàmwăpa muje maja mu Nyuma. Yèyè, ùkaavwa mwenzè bintu bya mishindu yònsò, kadi kàvwa mwanjì kupeta Nyuma Mwîmpè to. “Paanyimà pàà wêwè mukùdimùne mucimà, wakànkamika bânà beenu,” aci’s ncìlelèlè, “ùkumbajè ndongamu Wendè.”

⁶⁰ Mpindyewu ngănji njikijè kubala kwa Yone 14.12. Mpindyewu mu nshapità wa 14 ku mvensà wa 12, Yesu mmwambe ne: “Bulelèlè, bulelèlè, Ndi nnwàmbila ne, ewu udi witabuuja...” Ne wêwè kwèna mwa kwitabuuja... “Ûngiitabuuja Mémè.” Udi mwa kwitabuuja *mu* Yèyè. Mbanganyi bàdì bùmvwà aci? Bămbè ne: “Amen.” [Disangisha didi dyamba ne: “Amen.”—Muf.]

⁶¹ Nudi bavùlùke, mu Byenzedi 19. Ndi ngumvwa bibì bwa kwimanyikila cyôci eci apa, kadi bikèngela anu ncyămbè mùdici cimvwila emu. Mu Byenzedi nshapità wa 19, pàvwà muyiishi wa ba-Baptistes ewu, mwine uvwa mwa—mwakwidyanganyi kadi uvwa mukùdimùne mucimà ewu, ne yèyè ùvwa ùyiisha ùfikisha bantu ku disùngidiibwa. Nenku bàvwa ne disànka dinene, biikàle anu bàcyònkómoka ne bèèla mbilà, munkaci mwa kwenza disangisha. Byenzedi 18, Akulà ne Piisikilà, tuvwa bacitèèle makèèlèlè dilòlò awu, nenku bàvwa bayè kamumòna. Ne bôbò bàvwa bamanyè ne ùvwa muntu munene, ne ùvwa mulongi. Ne ùvwa ùjaadikilangana ku Bible ne Yesu ùvwa Mwânà wa Nzambi, cibì mumanyè anu dibàtiiza dya Yone nkààyaadi. Kàvwa mwanjì kumanya dibàtiiza dya Nyuma Mwîmpè to. Pa nanku kwambayè. . .

Akulà ne Piisikilà, mulùme awu ne mukàjèndè, benji bàà ntentà abu; byôbi biine, ne Pòlò pèndè, ùvwa mwenji wa ntentà. Ne bôbò abu bàakapeta Nyuma Mwîmpè ku dilongesha dya Pòlò. Kwambabò ne: “Tudi ne mwanètu wa balùme mukese wíkala mwa kulwa kaaba aka. Ùlekelè yèyè àkulèku neetu ndambu pa bwalu abu.”

Nenku pàakalwà Pòlò ne kuumvwayè ùyiisha, wàkamanya ne ùvwa muntu munene, kwambayè ne: “Nukààdikù bapetè Nyuma Mwîmpè kacya nwítabuuja anyì?”

Bôbò ne: “Katùtu bamanyè ne kùdikù...bwa ne kùtukù Nyuma Mwîmpè to.”

Yèyè ne: “Kadi nku cinyi,” anyì mwakù mulelèlè wà cyena Ngelikà wùdiku, “nwàkabàtijiibwa mushindu kaayi?”

Bôbò ne: “Twètù tukàadi bamanè kubàtijiibwa kùdì Yone Mubàtiji.”

62 Mpindyewu tàngilààyaaku cyàkamba Pòlò. Pòlò wàkamba, ne: “Bulelèlà Yone wàkabàtiiza bwa kanyinganyinga; kÌ mbwà dilekelediibwa dya mpekaatu to, kadi bwa kanyinganyinga, wàmba ne, kÌ cinùdì biitabùùje.”

Paùdì witabuuja Kilisto bu Musùngidi webè sungasunga, udi witabuuja *mutàngile ku* dibàtiiza dya Nyuma Mwïmpè. Aci kÌ ndibàtiiza dya Nyuma Mwïmpè to, nwènù bânà beetu bananga ba-Baptistes. Ncya mafi.

Mwanèètù kampànda ùvwa ùngambila ditùkù adi, ne: “Mwanèètù Branham,” anyì kùkaadi cikondo kampànda, kùkaadi ngondo ndambu, kwambayè ne: “Mwanèètù Branham, Abraham’s wàkiitabuuja Nzambi, ne kubadiibwacì kùdiye bu bwakàne.”

Mêmè kwamba ne: “Cya bushuwa.”

Yèyè ne: “Ncinyì cikwabo cìdì muntu mwa kwenza pa kuumusha kwitabuuja?”

63 Mêmè ne: “Aci kÌ cyònsò cìdì muntu mwa kwenza. KÌ cyònsò cìdiye mwa kwenza leelu ewu, nkwitabuuja Nzambi. Kadi Nzambi’s wàkamupèèsha citampì cya ditengudiibwa.” ditwàlongù makèlèlèlè dilòòlò awu adi, “bu cimanyinu cya ne Yèyè wàkiitaba diitabuuja dyèndè mu Yèyè.” Nenku, leelu ewu, too ne piikalà Nzambi. . .

Wèwè udi witabuuja mu Yèyè paùdì uMwitaba bu Musùngidi webè sungasunga apu. Kadi pàdì Nzambi ùkupèèsha citampì cya Nyuma Mwïmpè, Yèyè wàkutù citampì too ne kwebe kwa Cyendelelele kuwàyà. Mpindyewu nwènù ba-Baptistes angàtaayi aci, nenku nènye neenù pa dikùbiibwa dya Cyendelelele adi. Eyowa’s, mukalenge. Bwalu: “Kanùbungamiji Nyuma Mwïmpè wa Nzambi to, unùdì batwibwe Nendè citampì too ne ku ditùkù dya bupikudi bwenu.” Kwèna mutwibwe citampì pa kwitabuuja *batàngile ku* to, kadi udi mutwibwe citampì kùdì Nyuma Mwïmpè. Efèsò 4.30: “Kanùbungamiji Nyuma Mwïmpè wa Nzambi to, unùdì batwibwe Nendè citampì too ne ku ditùkù dya bupikudi bwenu.” KÌ Cìdì cikutwà citampì, paùdì ulengeleela Nzambi, ne Yèyè mukutwè citampì ne Nyuma Mwïmpè.

KÌ mùdibi nanku, bwalu Bible mmwambe ne: “Muntu nansha umwe kèna mwa kubiiikila Yesu ne n’Kilisto to, anu ku Nyuma Mwïmpè.”

64 Wèwè udi wamba ne: “Ndi ncìitabuuja bwalu mmùdì mpaasàtà mwambe.” Yèyè mmubingè, kadi aci kaciyèna cibadiibwa bwebe wèwè nansha. “Ndi ncìitabuuja bwalu mmùdì Dìyì dyàmba.” Aci mmwòmò, kadi aci kÌ ncyèbe wèwè to, aci kaciyèna cibadiibwa bwebe wèwè nansha.

Mushindu wùmwèpelè wùdì mwa kwamba ne Yesu n’Kilisto, mpàdì Nyuma Mwïmpè ùbwela munda mwebe ne ùfla bujaadiki, ne ùjaadika Yèyè mwine ne: “Yèyè m’Mwànà wa

Nzambi.” Ki mushindu wùmwèpelè wûdi umanya dibùikà dya ku lufù, mpàdi Nyuma Mwímpè ùfla bujaadiki. “Piikalè Yèyè Nyuma Mwímpè mulwe, Yèyè neàmfidilè Mémè bujaadiki, neànùleejè maalu àcìvwavwà; maalu aa, àngãmbi Mémè aa, neànùvùlwijewu.” Kwàkucipetakù mu kàlaasà to. Nwamònu anyi? Yèyè neànùvùlwijè maalu aa.

⁶⁵ Mpindyewu tudi baswe kubala Mufùndù ewu too ne kwìnshì ndambu mpindyewu, Yone Munsantu 14.12.

Bulelèlà, bulelèlà, ndi nnwàmbila ne: Ewu udi ungiitabuujà mèmè, byenzedi bìndi mèmè ngenza yèyè neabyènzè pèndè; ne bitàmbe bunene. . .

Bidi ne, nkùdimwinu mujaalàme mwaba awu ùdi “bitàmbe bùngi,” nwènù baswe kucikèba.

. . .byenzedi bitàmbe bunene kùdi byòbi ebi mbyènzàye, bwalu mèmè ndi nya ku Taatù.

⁶⁶ Bu Yèyè mwa kuya ku Taatù, mpàvwà Nyuma Mwímpè mwa kulwa. Mmwómò anyi? Mukwabo Mufùndù mmwambe ne: “Mémè ncìyi muyè to, Musàmbi kààkulwa to. Kadi Mémè muyè, Nèngààlukilè cyàkàbìdi ngiikalè neenù, munda mwenu mene.” Nwamònu’s, n’Nzambi neenù. Kumutù kwenu, kumpàla; neenù, mu Kilisto; munda mwenu, mu Nyuma Mwímpè. N’Nzambi munda mwenu.

⁶⁷ Mpindyewu: “Byenzedi bìndi Mémè ngenza nenùbyènzè pèènu,” kacìyi cyenzedi cikwabo to. Kadi Nzambi mmuswe kutwàla Nyuma Mwímpè, munda mwebe, bwa kutùngunuka ne mudimu wumwewumwe wùvwàYe wènza munda mwa Kilisto awu.

Mudimu awu kawùvwa menemene wùkèngediibwa mu matùkù a Luther to. Cìvwa ng’Ekeleeziya wa Nzambi. Kawùvwa. . .Wàkatàmbe kukèngediibwa kakese mu matùkù a Wesley.

Bwalu: “Bàà pa buloba,” mùdi Bible mwambè, “bàvwa mwa kutàmbe kulwa ne butekète, ne lungenyi, ne lwonji lutàmbe dībà dyònsò.” Tudi. . .Bàà pa buloba bàdi bàtàmbe kulwa ne lwonji dībà dyònsò. . .Aci tudi bamanyè. Mòna’s, bantu bàdi bènza bintu leelu mu mushindu wà ne, kùkaadi bidimu lukàmà kùvwà kùyikù mwa kwikala mwele meeji ne kùvwa kufwànyine kwikala muntu wetù ewu ne cikisu cya mushindu awu to. “Bàtàmbe kwikala ne lwonji dībà dyònsò, ne beena lwonji nebàtàmbe kwenza maalu ne lwonji, dībà dyònsò,” mùdi Mufùndù mwambè, “lùvulangana anu kuvulangana.”

⁶⁸ Pa nanku, Nyuma Mwímpè mmukwàtèkwàte mudimu. Kùvwa anu kaamweyelu kakese kàà Yèyè awu ne Luther; kaamupùùyà kakese kàà Yèyè awu ne Wesley; ne mupùùyà wà mu ndòndò wà Yèyè awu ne Mpenta; mpindyewu mupùùyà awu ne Nyuma mbilwe cintu cimwe. Ùdi munkacì mwa

kudisanga, ùpàtula mupùùyà wumwewumwe wà bukolè wà Nyuma Mwímpè awu mwàkenzàYe kale wàwa amu, ùmwènesha byenzedi bimwebimwe byàkenzàYe kale wàwa, bìdi munkaci mwa kumwèneshiibwa leelu ewu mene ebi, cintu cimwecimwe aci.

⁶⁹ Tàngilàayi cyàkambà Yesu: “Bulelèlà, bulelèlà Ndi nnwàmbila ne, Mwànà kèna mwa kwenza cintu nansha cimwe to anu Yèyè ùmòna Taatù ùcyènza dyàmbedi. Cìdi Taatù wènza aci, Ùdi ùcileeya Mwànà. Taatù mmusòmbèle munda Mwànyì; Yèyè ngudi wenza byenzedi.” Nwamònu anyi?

⁷⁰ Mpindyewu mònaayi, cikwabo cintu ncyòci eci cìndi njinga kwamba kaaba aka mene. “Mùdi,” mwàkambà Yesu, “mùdi Taatù muNtùme. Mùdi,” mpindyewu tàngilàayi, “mùdi Taatù muNtùme, ki mùNdi pàànyì nnùtùma.” “Mùdi Taatù. . .” Taatù wàkaMutùma bìshi? Taatù, wàkaMutùma awu, wàkatùùluka mu Dyulu e kusòmbelaYè munda Mwèndè.

KutùngunukaYè. KwambaYè ne: “Ndi ngenza misangu yònsò anu cìdi cisànkishà Taatù Wanyì.” Nwamònu anyi? Wàkaya wènda wènza bintu bivwà Taatù ùMuleeya bwa kwenza. “Ncyèna ngenza cintu nansha cimwe to anu cìdi Taatù Wanyì ùNdeeja dyàmbedi.” Nzambi uvwa muMutùme awu, ùvwa munda Mwèndè. “Nenku mùdi Taatù muNtùme amu, mushindu wumwewumwe wùdi Taatù muNtùme awu, ki mùNdi nnùtùma pàànyì.” Ncinyì aci? Nzambi munda mwebe, ùtùngunuka ne (cinyì) byenzedi bimwebimwe abi, bimwebimwe abi.

Yesu wàkamba ne: “Kùdi. . .ewu udi *witabuuja*, ewu udi naaNyì munda mwèndè awu, Nyuma Mwímpè; ewu udi *witabuuja*, ukàadi mumanè kufila bujaadiki bwa dibikà Dyànyì dya ku lufù, mumanyè ne Mémè ndi munda mwèndè awu. Ewu udi munda Mwànyì awu; nwènù bashààle munda Mwànyì, Méyì Àànyì mashààle munda mwenu.”

⁷¹ Mpindyewu wèwè udi wamba ne: “Mémè ndi musòmbèle munda mwa Yesu; kadi ncyà bushuwa ne ncyèna ngiitabuuja dyondopa dya kùdi Nzambi to.” Aci’s cìdi cileeya ne Yèyè kènamù.

⁷² “Ndi mwitabùùje mu Yesu; ncyèna ngiitabuuja mu Nyuma Mwímpè mu ditùkù edi nansha, kî mmwàkaMupetàbo kale wàwa to.” Aci’s cìdi cileeya ne Yèyè kènamù.

⁷³ Nyuma Mwímpè neàfilè bujaadiki bwa Dìyì dyònsò dyàkambàYe. Yèyè kî mmwena mashimi nansha. Kèna ùciina muntu nansha umwe anyì bulongolodi nansha bumwe to. Kabyèna bikèngela bwa kutwìlaYè muntu nansha umwe binù to. Yèyè ùdi wàkula, ne pashìishe Ùdi ùshààla naaci.

Beena myânzù mitùmbùke, ne bakooyike, ne bàdi balongè tùlaasà, anyì mutùdi mwa kucibìikila ne, bàdi bàkòokeshà bwa mabanji àdìbo naawù, bòbò kabàyi baswe kuMupeta to, “Nzambi ùdi ne bukolè bwa ku mabwe aa kujuuðila

Abraham bânà.” Yèyè neàngatè baakánkè, ne basùmbishi bàà mu musokoko bàà maalà a kapyà, ne bikwabo byònsò, ne neàbijuulè. Nzambi ùdi mwa kucyènza, ne ki kucyènzaYe eku. “Nzambi ùdi ne bukolè bwa ku mabwe aa kujuudila Abraham bânà.” Muntu kampànda neàcyènzè, bwalu Yèyè ùdi Nzambi.

⁷⁴ “Nwènù bashààle munda Mwànyì, ne Mèyì Àànyì munda mwenu, nùlombè cinùdi baswè,” bwalu nudi nulòmba Dìyì Dyèndè, ne Dìyì Dyèndè didi Mwoyi. Úcyàmbè. Pìikalàbi ne Nzambi mmucyàmbè, ne wèwè mutwishùbwe ne Yèyè mmucyàmbè, Nyuma Mwímpè ùdi ùfila bujaadiki ne Dìyì ndilelèlè, díbà adi, ki bwalu mbwòbù abu’s, mwanèètù. Úcyàmbè; ki cyòci aci. “Ambilà mukùnà ewu ne: ‘Tentèmùkà,’ kùyi wela mpatà munda mwa mwoyi wèbè to, kadi witabuujà ne ciwàmbì aci necyènzèkè.” Udi wakula awu kî ngwèwè to, kadi n’Taàtù udi musòmbèle muda mwebe; Yèyè ngudi wakula. Kî ngwèwè udi wakula ne mukùnà awu to, n’Taàtù udi munda mwebe, wàkula ne mukùnà awu. Wùdi ne cya kutentemuka. “Maulu ònsò ne buloba nebijiminè,” mwàkambàYe, “kadi Nyuma Wanyì to, anyì, Dìyì Dyànyì kadyàkujiminakù to.” Cya bushuwa, kaDyèna mwa kujiminakù to. Taatù!

⁷⁵ Mpindyewu: “Byenzedi bìndì Mèmè ngenza.” Nzambi ùdi munda mwa Ekeleeziya Wendè, bwa kutùngunuka ne midimu Yèndè. Ki cyàkatùminàYe Nyuma Mwímpè. Mpindyewu, Yèyè ùvwa mumanye cyòci aci. Yèyè, Ùvwa mumanyè ne kacìvwa cifwànyine kwikala to, kacìvwa mwa kwenzeka mushindu awu to, pa nanku nansha bya munyì, pa nanku bivwa bikèngela anu Àtumè. Taatù wàkatùma Mwànà, wàkatèèka cyònsò ciwà mu bukòk- . . . Mwànà munda mwebe. Nenku byenzedi bimwebimwe byàkènzàYe abi, byenzedi anu byòbi bimwebimwe byàkènzà Yesu abi, nwènù nenùbyènzè pèènù, Ekeleeziya.

Nwènù kanwènakù baswe kwenza byenzedi bya Nzambi anyi? Yesu mmwambè ne: “Nwènù baswè kwenza byenzedi bya Nzambi, ngiitabùjaayi Mèmè.” Udi uMwitabuujà bishi? Kwèna mwa kucyènza paùdi kùyi mupetè Nyuma Mwímpè to.

⁷⁶ Bwalu, muntu nansha umwe kèna mwa kwamba ne Yèyè m’Mwànà wa Nzambi to; wèwè udi wamba cidì kampànda mukwabo mwambè. “Bible mmwambè ne Yèyè ùdi Mwànà wa Nzambi; mèmè ndi ngiitabuujà Bible.” Eyo. “Bible mmwambè ne Yèyè ùdi Mwànà wa Nzambi; mèmè ndim ngiitabuujà Bible. Mpaasàtà mmwambè ne Yèyè ùdi Mwànà wa Nzambi; mèmè ndi ngiitabuujà mpaasàtà. Maman mmwambè ne Yèyè ùdi Mwànà wa Nzambi; mèmè ndi ngiitabuujà maman. Mulunda wanyì mmwambè ne Yèyè ùdi Mwànà wa Nzambi; mèmè ndi ngiitabuujà mulunda wanyì.”

Kadi mushindu wùmwèpelè wùndiku mèmè mwa kwamba ne Yèyè ùdi Mwànà wa Nzambi, mpàdi Nyuma Mwímpè ùbwela ne ùfila bujaadiki bwa Yèyè mwine, díbà adi ndi mmanya ne

Yèyè ùdi Mwàna wa Nzambi. “Muntu nansha umwe kèna mwa kubìikila Yesu ne ‘n’Kilisto’ to, anu ku Nyuma Mwímpè.” Ki bwalu abu’s!

⁷⁷ Muntu nansha umwe wàkwila ku Nyuma wa Nzambi kàtukù mubiikile Yesu ne mmwediiibwe mulawu, anyì wàmba ne Yèyè ùvwa cintu kampànda mu ditùkù adi ne cingà cintu leelu ewu to. Aci’s cidi ciMuvwija ne butekète ne wa kàyi kukwàcila kaaba kàmwè. To, mukalenge.

Yèyè ùdi umwèumwè awu makèèlèlè, leelu, too ne kashidi. Nyuma kanà yònsò wa bulelèlè neàfilè bujaadiki abu. Eyo.

⁷⁸ Mpindyewu, Yèyè wàkamba ne: “Byenzedi bìndi Mèmè ngenza ebi nenùbyènzè pèènù,” Yone 14.12, mpindyewu, byenzedi bimwebimwe abi.

“Kaa,” mùdibo bàmba, “ekeleeziya’s ùdi wènza cyenzedi cya citàmbe bunene leelu ewu.” Mu mushindu kaayi?

Yèyè nyawu mwambè ne: “Byenzedi bìndi Mèmè ngenza.”

“Abi,” mùdibo bàmba, “ee, s’tudi ne ba-missionnaires pa buloba bujimà, s’ki cyenzedi cya citàmbe bunene aci.”

⁷⁹ Kadi Yèyè wàkamba ne: “Byenzedi bìndi Mèmè ngenza.” Mpindyewu byènzààyaaku’s, anjààyi kubyènza, pashìishe nwàkulè bwa ba-missionnaires.

⁸⁰ Leelu ewu, kùkaadi cikondo kampànda mvwa ngaakula bwa Mùzùlumanyi kampànda, yèyè kwamba ne: “Mahomet awu’s mmufwe.”

“Aci neya bushuwa ne, yèyè ùdi mu lukità, kadi dîngà ditùkù neàbiikè ku lufù.” Yèyè ne: “Yèyè mujuukè mu lukità, buloba bujimà nebàcimanyè munda mwa mèbà makumi abidi ne anaayi.” Yèyè ne: “Nwènù aba’s nutu nwamba ne Yesu mmubiike ku lufù kùkaadi bidimu binunu bibidi, kadi nansha cyàbisatù cìmwè cya bantu kí mbanjì kumanya bwalu abu to.”

S’mbwalu nudi bacyàmbile ku mmwènenu wa mamanya a mu mitù. Nudi baakùle biimànyine pa mmwènenu wa tùlaasà anyì wa dilonga dya tùlaasà.

Ekeleeziya mujimà, munene wa Nzambi ewu, tubadilakù ne Katolike, Mishònyì, bònsò basanga ntete, bu ne bàtu bapeté Nyuma Mwímpè, buloba ebu’s nùнку mbushààle bushindàme mu bwena Kilisto; nùнку kí nkufwànyìnekù kwikala cintu pààci ne n’communisme to; nùнку kí nkufwànyìnekù kwikala cintu pààci ne mmvità, anyì lukunà, anyì lwonji, anyì lukìnu to. Nùнку’s Yesu mmusòmbe pa Nkwasa Wendè wa butùmbi, ne twètù twenda twendakana eku ne eku mu mpàlàdiizò wa Nzambi, biikàle ne Mwoyi wà Cyendeleele, biikàle ne mwoyi kashidi; bamanè kubìishiibwa ku lufù mu mubidi mupyamùpyà, twenda twendakana, katùyìkù mwa kukùlakaja, katùyìkù mwa kutòloka mvya, katùyìkù mwa kusaama, katùyìkù mwa kuumvwa nzala to; twenda twendakana mu masànkà a

Mukalenge, tuyiikila ne nyama. Nenku, kaa, ditùkù kaayìpu's wè! Kadi tudi benzè byònsò pa kuumusha civwàYe . . .

⁸¹ Yèyè wàkamba ne: “Ndàayi pa buloba bujimà nùkayiishè Evanjeeliyo.” Evanjeeliyo ùdi wènzà cinyi? “Kí ng'anu mu Diyì nkàayaadi to, kadi mu Bukolè ne dileeja dya patòoke dya Nyuma Mwímpè.” Kumwènesha Dìyì dya Nzambi, ki Evanjeeliyo nyèyè awu.

⁸² Kwéna mwa kucyènza to. Mpindyewu, Yesu ùvwa mumanyè aci ne, bìvwa bikèngela kwikalaYè ne mwoyi munda mwa Ekeleeziya Wendè.

Pa nanku, Yèyè ùvwa mumanyè ne netwikalè ne bilongelu bya mamanya a mu mitù. Kadi kanwàkupetakù Cyôci eci mu cilongelu cya mamanya a mu mutù to. Bôbò nebàbènganganè naaCi. Bwalu, cyònsò cidìbo bôbò bamanyè cidi anu diyiila dya kùdì muntu kampànda wa meeji matwè, twitabàayi anyi dngumba kampànda bìdìbo baswè kwi—kwikala ne mwoyi ku byôbì. Pa nanku, bôbò—bôbò nebàkushikikè mu cyôci aci ne kukuvwija cidimba cya mubidi awu, nenku, mwanèètù, bàkutèèlela tùmwe tuubintu twà mu twitabàayi kampànda bìdì bifwànyine kumwènèka anu bu ne mbipwàngàne. “Ekeleeziya munsantu munene, maamù, mmukàndàmèène bisuusù byàbùngi, mmukàndàmèène mikùmù yàbùngi.” Nansha dyabùlù pèndè's; yèyè's mbamwipàtùipàte myaba yònsò yidìku ayi, pàmwe ne yònsò, kadi mmutùngùnùke wènda ùya anu mwèndè ne kale. Eyowa's, mukalenge. Kaa, nebàteete kutèèla byôbì ebi.

⁸³ Pa nanku Yesu ùvwa mumanyè ne kùvwa mwa kwikala nkwaka munene wa mamanya a mu mitù anu mwàkadiyi mu matùkù Èndè amu, kubwela mu disukula dya ngeesu ne mpanù, ne divwàlà dya bilàmbà, ne nshingu ya nkoolò, ne byònsò mùvwàbo bàbyènza amu, bintu byònsò bishiièlèshiièlàngàne ebi bìvwàbo mwa kwenza. Ùvwa mumanyè ne bàvwa mwa kwenza nanku, pa nanku kwambaYè ne: “Mpindyewu anjì indilaayi kakese. Ncyàkunùshiya kanùyì busàmbi to, Nèngààlukilè cyàkàbìdì bwa kwikala neenù. Ki bwa cinyi,” mwakambàYe, “byenzi bìnì Mèmè ngenza, nenùbyènzè pèenù.”

⁸⁴ Kiiipàcilà kàà ditùmà dya Nyuma Mwímpè kàvwa mbwà Nzambi kutùngunukilaYè mu musùmbà wà bantu, bwa kumwènesha Nzambi dìbà cyònsò kùdì bàà pa buloba. Aci mmùdici menemene. Kakùyì ku twitabàayi, kakùyì ku dingumba to, kadi ku Bukolè bwa dibiiikà Dyèndè dya ku lufù, ku divwija dya Dìyì Dyèndè dilelèlà; ku dyangata dya mulayi Wendè, ne ku diimanyina ku luseke lwà banyaàbanyà, ne mu kwitabuuja kwa Nzambi; nenku mònaayi maulu mafiike mùdìwu ààlukila cyànyimà, ne Bukolè bwa Nzambi bùbwelamù bwàngata bukòokeshi. Amen. Ki cidìYe muswe. Ki cidì Nyuma Mwímpè mutùmina ncyôci aci. Ki cyàkaMutùminàYe. Twàmanyi mpindyewu cidìYe, ne ki cyàkaMutùminàYe ncyôci aci.

⁸⁵ Ki bwa cinyì, mashi makwabo nansha àmwè kaàvwa mafwànyine kujidila bantu to. Mémè ncivwa mwa kukujidila wèwè to, ne wèwè kùvwa mwa kunjidila mémè to, bwalu tudi bônso balediibwe ku disangila dya mulùme ne mukàjì. Kadi Yesu wàkalediibwa kakùyì disangila dya mulùme ne mukàjì to, ncyà bushuwa, pa nanku Èndè Mashi ngàvwà majididi. Nenku Nzambi wàkapweka, wàkenza mubidi, wàkasòmbelamù, wàkeela Mashi awu panshi bwa kujidila ewu nùnkù, kakùyì mpatà to ki cyàkiipatà dipiilà dya ku mpekaatu ne bundù. Dìbà adi, ku diitabuuja, ku diitabuuja dya Cyòcì aci, Nzambi ùdi ùpweka buludi mu mubidi wà buntu awu, ku dijidila dya ku Mashi awu, ùmuvwija Dimiinu dya Abraham, ku diitabuuja.

⁸⁶ Bwa kwitabuuja ne Mashi awu àvwa àlwa, Mashi makezùke awu àvwa mwa kwikala cishimà byenzè bu mashi èndè yéyè, yéyè wàkenda mwaba awu paanyimà pàà “mumanè kwikala anu bu mufwè wa menemene ewu.” Wàkiitabuuja Nzambi munda mwa bidimu makumi abidi ne bitaanu, mwikàle ne bidimu makumi mwandamutekètè ne bitaanu, ne wàkiitabuuja too ne pààkapetàye bidimu lukàmà. Ne Sarah, bidimu makumi asambombo ne bitaanu, ne wàkiitabuuja too ne pààkapetàye bidimu makumi citeema. “Ne mulùme mwikàle anu bu mufwe menemene.”

Nenku Nzambi kwamba Yè ne: “Bwa kaciikadi cyàlwa kupita bantu to, ndà nendè pa kakùnà aka ùmulàmbùlè bu mulàmbù wà mashi.”

⁸⁷ Kwambilayè basadidi ne: “Imànaayi mwaba ewu ne kampundu nwindilè. Mwanàanyi wa balùme ne mémè netùye kwàka bwa kakuukwila, ne mwanàanyi wa balùme ne mémè netwàlukilè.” Kaa, neàcyènzè bìshi’s?

Abraham kwambayè ne: “Ndi mumupetè bu udi mufùmìne ku bafwè. Nenku ndi mumanyè ne Yéyè uvwa mumumpèeshe, bu udi mufùmìne ku bafwè awu, ùdi ne bukolè bwa kumujuula ku bafwè bu mémè anu mwa kushààla mulamè Dìyì Dyèndè. Kulama, mémè ndi ndama Dìyì Dyèndè; Yéyè ùdi ne bukolè bwa kumujuula ku bafwè.”

⁸⁸ Wàkula anu menemene bwa Kilisto! S’n’Yéyè awu. Nenku ku kabùlù kàà Mashi aku kulwakù Nyuma Mwïmpè, uvwa muDìkùte mu mubidi wàkabiikidiibwà ne n’Yesu awu. Mashi awu àkajidila njila kampànda, ku diitabuuja, bwa kubìikila bapikula, anyì Basungula bàà Nzambi. Nenku paùdi umana kwitaba Aci, ne Nyuma Mwïmpè muumùshe lwonji lwònsò munda mwebe, Yéyè ùdi ùbwela buludi, Nzambi Yéyè mwine, bwa kwenza diswa Dyèndè.

⁸⁹ Pànu panshi, mfùmwebè wa mudimu wa lwonji awu ùdi ne cilunji cibi; ne *kampànda* mukwabo wa kale ewu ùdi wenza *cikampànda*; ne mulùmýàna wa kale udi wakula bwa Cyòcì aci

ewu, ùbèngangana naaCì. Muntu mùle tètè ne Nyuma Mwîmpè neïmanè anu mumpàlà mwàci mene. Amen.

⁹⁰ “Ne bààkatèya ntèmà. Bàvwa bapangi ne kabàyi balongè mukàndà to, kadi bààkatèya ntèmà kumanya ne bàvwa ne Yesu.” Ki cyàkavwilà Nyuma Mwîmpè ncyòci aci.

⁹¹ Mulobi mukese wa kale kàvwa mwa kufùnda dîna dyèndè to. Kadi wàkiimana mwaba awu e kwambayè ne: “Netwitabuujè nganyi, muntu anyi Nzambi?” Amen. “Bimanyiibwè kunùdi ne, twètù netùtungunukè anu ne kuyiisha mu Dîna dya Yesu.” Ekelekele, bukìtù kaayi! Ùvwa mumanyè ne ù—ùvwa ne Nzùbu muulu mwàmwa. Ncyà bushuwa. Yèyè ùvwa mwena lwendu ne mwenyi pànwapa. Ùvwa wènda ùkèba Cimenga cicilwalwà.

Mwakwidi mwena lubombo awu ùvwa ne mushinga kaayi bwèndè yèyè? Yèyè ùvwa mwinshì mwa bukòokeshi bwa Nzambi wa mu Dyulu, uvwa mujuulè Mwan’Endè ku lufù, Kilisto Yesu, ne mumuujè ne Nyuma wa Nzambi wàkafùka mauulu ne buloba awu. S’ki bwalu mbwòbù abu. Kàvwa nendè bwòwà to. To, mukalenge. Lufù. . .

⁹² Mòna’s, pààkapàtukàbo ne ka-Stèfanò aku muntwamu, ne kwambabò ne: “Umùsha dîyi adi!”

Yèyè ne: “Nwènù beena nshìngù mitàndàbàle aba, ne kabàyi batengula mu myoyi ne mu maci, nudì misangu yònsò anu nukàndameena Nyuma Mwîmpè. Mwàkenzà baatatwènù, ki munùdi nwenza pènù.”

Bòbo ne: “Netùkututuè ne mùdi ufwà!”

Yèyè ne: “Kanwèna bafwànyine kwenza nanku to nansha bishi. . .”

“Kadi netùkuleejè ní tudi mwa kucyènza anyi katwèna mwa kucyènza!” Ki kwangulabò mabwe manene ne kubangabò kumunàngulawù ku mutù.

⁹³ Kubàndulukayè, kwambayè ne: “Ndi mmòna Maulu munzùlùke. Ndi mmòna cibàndilu cyènda cipweka. Ndi mmòna Yesu mwimàne ku dyàbalùmè dya Mutàmbe Bunene.” Ne Bible kí mmwambè ne yèyè wàkafwà nansha; wàkaya mu tulù. Kaa, ekelekele! Mémè ndi anu mwa kumòna Mwanjelo ùpweka, ùmwambula ne ùmusèkenkeja bu mwànà wa mu dibòkò, maamù’s, too ne mwàkayàye mu tulù. Kaa, ekelekele! Bushuwa.

⁹⁴ Ki kiipàcilà kàà Nyuma Mwîmpè nkòkò aku. Ki cyàkatùminà Nzambi Nyuma Mwîmpè ncyòci aci. Nyuma Mwîmpè mmulwè bwa kukupèèsha Bukolè. Ndi ne mikwabo Mifùndu kaaba aka, katanci kakese cyanàànà. Nyuma Mwîmpè mmulwè bwa kukupèèsha Bukolè. Ncyè—ncyèna. . . Nudi mwa kupeta ebi; ndi mutàmbe kuya kule be, dilòlò edi.

Kukupèèsha Bukolè, Bukolè mu disambila!

⁹⁵ Angàtá muntu utu ne nsòmbelu mwîmpè, kadi mwikàle misangu yònsò anu mucimùnyìibwe. “Kaa, ndi nkwambila . . .” Muntu mwîmpè: “Kaa, bushuwa’s, mêmè’s ndi munangè Mukalenge, Mwanèètù Branham.” Misangu yònsò anu mucimùnyìibwe, kàyi ùpetakù dyandamuna ku disambila.

Uujàku anu kakàjàànà aku musangu wumwe ne Nyuma Mwîmpè, kadi tàngilà ùmonè cidì cyènzekà. Pàdiye ùya kumpalà kwa Nzambi, kèna ùcimunyiibwakù to. Ùdi ùlwa ne bukitù bwònsò ku Nkwasa wa butùmbì wa Nzambi, mwitábùùje. Ùdi ne bukenji bwalu mmwànà wa bakàji wa Nzambi, ku Dilediibwa.

Angàtá kalùmyànà kàka, kadi katàmbe kutulumuka aku, mfùmwendè wa mudimu ùmutwà misèbà mu mwaba wònsò awu. Wàmba ne: “Anji indilà kakese mwab’ewu mpindyewu.” Cintu kampàndà ncishintùlùke, nwamònu’s, mmupetè Nyuma Mwîmpè. Ùdi ùkupèèsha Bukolè. Nsòmbelu webè mmùle tètè ne Bukolè.

Ùdi ùkupèèsha Bukolè mu dyakula.

⁹⁶ Mòna’s, ekelekele, bantu bàvwa bàcìna abu, biimàne mwaba awu; Peetèlò, Yakòbò, Yone, Luukà, ne bakwabo bònsò abu. Bàkaavwa babwelè mu cibambalu cya kuulu, bàmba ne: “Kaa, katùcyèna kabidi ne cya kwamba to. Bàba, tàngilàayi kwàka, s’n’Docteur *Kampàndà* wàwa ne kansanga mwaba wàwa. S’n’Laabi *Kampàndà* wàwa ne kansanga. Nudi bamanyè’s, yèyè mmupetè mapòlomè anaayi a ku cilongelu citùmbùke; mmunyi mutwàkùngamanganàku nendè’s?” Peetèlò kwambayè ne: “Kaa, mêmè’s ndi mvùluka ne ngàkasùmbisha muntu wàwa mishipa dîngà ditùkù. Yèyè, wàkula anyi, ncyàkamanya nansha ciine cìvwàye wàmba aci to. Kaa, ncìvwakù mfuwànyine kukùngamangana nendè to.” Kadi ncinyi. . .

“Tudi mwa kwenza cinyi, bânà beetu?”

“Yèyè mmwambe ne: ‘Nwindilàayi.’”

“Ee, s’nyewu tukàadi mwab’ewu matùkù anaayi.”

“Tùtungunukè anu ne kwindila.”

“Too ne dîbà kaayi?”

“Too ne.”

“Ee, Yèyè mmwambe ne necyènzekè mu ditùkù diitànù anyi?”

“Yèyè kî mmwambe ne too ne dîbà kampànda to. Yèyè mmwambe ne: “Too ne.”

Ee, bààkatùngunuka anu ne kwindila. Too ne dîbà kaayi? “Too ne.” Matùkù mwandamukùlù kupitàwù. “Too ne.” Matùkù citeama kupitàwù. “Too ne.”

Ki ndekeelu wa byònsò pàakalwà ditùkù dya Mpenta kukùmbana, bàvwa bònsò mu mwaba wumwe, ne dîyi dimwe.

97 Nzambi ùkaavwa mumanè kwikala kumutù kwabo, mu Ditutu dya kapyà; Nzambi ùkaavwa mwendè naabo, pa buloba; mpindyewu cintu kampànda cikwabo civwa ne cya kwenzeka. Cintu kampànda cikaadi pabwîpi ne kwenzeka.

... *bàvwa bônso* mu mwaba wumwe, ne dîyi dimwe.

Ki dyàkàmwè kulwakù cyonà cìfùmina mu dyulu bu...cipeepèlè cicolè cya civuma, ne cyakuuja cibambalu cijimà civwàbo basòmbèle.

... *ndìmi mipandùlùke...yàkasòmba pamutù... pààbò.*

Mipandùlùke ncinyi? “Myabùlùke.” Byenzè bu bàdì bàkukumina, kacya nukààdikù bumvwè muntu ùkukumina anyi? Ûdi wènta ne, “uh-uh-uh, kaa, uh-uh,” nwamònu’s, kàyi mwa kwamba cintu ciine to. “Mipandùlùke, myabùlùke.” Byenzè mùdì cikòndò *cipandùlùke* amu, cyùmvwija cintu kampànda ciikàle “citàpùlùke, cyabùlùke.” Kabàvwa bàyiikila to. Kabàvwa bàkukumina to. Kabàvwa bènza cintu nansha cimwe to kadi bènza anu mutooyi cyanàànà.

... *ndìmi mipandùlùke yàkasòmba pamutù pààbò,* byenzè bu ne nkapyà. (Kaa, kabàvwa mwa kudikànda tò!)

Ne bààkuujiibwa bônso tèntè ne Nyuma Mwîmpè, ... (Yoyoyò!)

98 Pashìishe cyàkenzekà ncinyi? Bàkapàtuka e kubwela mu mìsèèsù. “Laabì Jones awu wèpi? Mulúmyànà awu wèpi? Ne muntu wa mpolondo wa mamanya a mu mutu awu wèpi?

“Nzambi ùvwa kumutù kwetu, ne Mòsà, mu kaacipuka kàà kàlàkuka kapyà; Yèyè kutùdìisha manà, a ku Dyulu. Yèyè wèndì neetù munda mwa bidimu bisatu ne yisambombo...bidimu bisatu ne ngondo yisambombo, pa buloba apa. Kadi mpindyewu Ûdi munda mwànyì. Udi wakula ewu kì mmèmè to; n’Yèyè. Ndi mumanye ne Yèyè ùdi Nganyì, ne ndi mumanyè ne mèmè ndi nganyì. Kàcyèna mèmè kabidi to; n’Yèyè.”

Lwàyi nendè kaaba aka! *Nwènu beena Izaleela, ne ... nwènu bàdì basòmbèle* mu Yudààyà, eci *cìmanyiibwè kunùdì*—*cìmanyiibwè kunùdì, ne tèèlejàayi dîyi dyànyì,* nwènu bônso bayiishi ne baalaabi.

Yoyòyò! Ekelekele! Bukolè bwa mu dyakula! Kaa! “Bantu aba kì mbakwàcìke maalà to!” Wàkwila banyààbanyà abu’s, lukàmà ne makumi abidi abu, bibèngàngàne ne binunu dikumi anyi bapite apu.

... *bantu aba kì mbakwàcìke maalà to, munùdì nwènu nucinika amu, pa kumòna ne tucidi anu pa dîbà citeema dya ditùkù.*

Mêmè ndi muyiishi wa Evanjeeliyo mu kaabujimà.
Kadi eci ncyàkambàbo kùdi mupròfetà Yowelà;

... nebyènzekè mu matùkù a ndekeelu, mùdi Nzambi wàmba: Nèngùcikijè... Nyuma wanyì (yoyòyò) pa mubidi wònsò, ne beenu... Nwènù kanwènàkù bamòne Màriyà mwaba awu ùja maja mu Nyuma, wàkula mu myakulu ne wènza bintu bya mushindu awu anyì?... pa mubidi wònsò:...

... ne pa basadidi bànyì Nèngùcikijè... Nyuma wanyì;...

... Nèndeejè bimanyinu mu maulu muulu, ne... pa buloba mwinshì;... makunji a kapya, ne mabungì a mîshì:

Nzambi ùvwa mu bantu Bèndè dîbà adi. Amen.

“Ee, mpindyewu, wêwè utu mupetè dipòlomè kaayi? Mpenyi, mmu cilongelu kaayi mùdi mupàtùkìle?”

⁹⁹ “Aci kacỳèna ne cìdici cìshintulula to bwa mpindyewu ewu.” Kaa, ki kubangayè kwicikija Mifùndu’s.

(Davìdi wàkadyànjila kumumòna!)... Mukalenge misangu yònsò kumpalà kwànyì... ncyàkunyungishìibwa nansha;...

... kabidi mwoyi wànyì wàkacyònkómoka, bwalu... ne ludìmi lwànyì lwàkalwa ne disànka;

... yèyè kààkushìya musùùkà wànyì mu iferno, anyì yèyè kaakwanyìsha bwa Wa Cijila wendè àmonè dibola nansha.

... lekèlaayi ngààkuleku neenù mudìlekèlèle bwa nkambwà Davìdi, ... yèyè mmufwè ne mujiikùbwe, ne majambu èndè àdi àsanganyìibwa munkacì mwetu... leelu ewu.

Kadi bu mupròfetà... yèyè wàkamòna dilwa dya Mwakàne Awu.

... ne bìmanyìibwè kunùdi ne, Nzambi mmuvwijè Yesu umwèumwè ewu, Unùdi nwènù bapoopèle pa nkùrusè ku byanza bya lwonji, Mukalenge ne Kilisto. (Amen!)

¹⁰⁰ “Balùmyànà ne bânà beetu, citùdi mwa kwenza ncinyì bwa twètù kusùngidiibwa?”

... kwambayè ne: Nyingàlalaayi, yònsò wa kunùdi, ne nùbatìijìibwè mu dìnà dya Yesu Kilisto bwa dìlekelediibwa dya mpekaatu yenu, nenku nenùpetè kupà kwa Nyuma Mwìmpè.

Bwalu mulayi wùdi kunùdi, ne kùdi bânà beenu balela, ne kùdi aba bàdi kule menemene, mu bùngi bwònsò bwàbìkilabo kùdi Nzambi wetù abu. (Amen.)

¹⁰¹ Bu mùcìdì anu Nzambi ne cisàmbà, Nzambi ùdì anu ne Ekeleeziya, Nzambi ùdì anu ne Nyuma Mwîmpè udi wenda Nendè. Ki cyàkafidilà Nzambi Nyuma Mwîmpè ncyôci aci. Beena mamanya a mu mitù nebàjuukè; bàtu anu bajuukèjùùke misangu yònsò. Kadi Nzambi ùdì ne banyààbanyà mwaba kampànda. Nzambi ùdì ne Ekeleeziya mukese watùngunuka ne dibàtiiza dya Nyuma Mwîmpè, bwa kwamba kujaadika Bukênkè. Nenku bôbò abu, ku bujaadiki bwabo, ki bàalumbulwishà bàà pa buloba.

Bible kî mmwambèku ne Yesu mmwambè ne: “Bàà disànka ng’aba bàdì batòòke mu mwoyi; nebàmonè Nzambi” anyi? Ne Yèyè kèna wàmbakù, ne: “Baakàne, bansantu, nebàlumbulwishè buloba” anyi? Cya bushuwa’s.

Bujaadiki bwenu leelu nebùtwalè dilumbulwisha pa cimenga eci. Bujaadiki bwetu bwa Nyuma Mwîmpè ne Bukolè bwa Nzambi, nsòmbelu wa cijila, nebùtwalè dilumbulwisha pa cimenga. Pìikalà eci. . .

¹⁰² “Aba bàdì bàà kumpàla nebiikalè bàà ndekeelu; aba bàdì bàà ndekeelu nebiikalè bàà kumpàla.” Ncyàkumanya kantu nansha kàmwè bwa Sankey ne Moody to, mu dibìikà dyabo dya ku lufù. Bôbò kabàakumanya kantu nansha kàmwè bwànyì mèmè to, mu edi nùнку. Kadi mèmè nêngùimanè mu edi nùнку, bwa kufila bujaadiki; ne wèwè pèèbè.

Nenku ku cyôci aci, ku dimwàngalaja dya Bukênkè bwenu, ne ku dibàtiiza dya Nyuma Mwîmpè, ne ku nsòmbelu yinùvwà naayi, ne ku bintu bìdì Nzambi mwenzè bwa kujaadika ne Yèyè ùdì ùkwàta mudimu kaaba aka; kadi ne mamanya àbò a mu mitù, mbayè kule naaBù; bôbò nebàlumbulwishiiwbwè kùdì bansantu. Bôbò mbamana kulumbulwisha. Mbamanè kupìcilakù. Kaa, ekelekele!

¹⁰³ Mvwa ngaakula pa Bukolè bwa disambila, Bukolè bwa mu dyakula, Bukolè bwa nsòmbelu wa cijila. Amen. Ki cìdì Nyuma Mwîmpè ne cya kwenza ncyôci aci.

¹⁰⁴ Bàmwè bàà kunùdì bàdì bènda bèndakana, nwamba ne: “Ee, ncyèna anu mwa kulekela dinwà dya maalà to. Ncyèna anu mwa kulekela dyanza dya *cikampànda* to.”

Nyuma Mwîmpè ùdì ùlwa s’mbwà kusòmbela munda mwebe, bwa kwenza ne byònsò bya ne *ncyèna mwa* abi bikuumùkè. Ncya bushuwa’s. Kulekeesha bakàjì dikòsa dya nsuki yabo, kubàlekeesha divwàlà dya tùpùtulù ne mìpanù. Kakùyì tubingilà to. Kubàlekeesha kabwabwa. Kaa, eyowa’s, ki bwa cinyì Yèyè ùdikù, bwa kukupèèsha nsòmbelu wa cijila. Yèyè ngwàlonda dileeja dya njila dya Bible dîbà dyònsò.

¹⁰⁵ Mukàjì kampànda wàmba ne: “Kùdì anu luuyà lukolè be; bikèngela anu mvwalè byòbì ebi. Bidi bìnsaamisha mutù mèmè mulekèle nsuki yànyì yileepa.”

Kadi kakwèna tubingilà kùdì Nyuma Mwímpè to. Yèyè ùdikù mbwà kucyènza nanku. Yèyè ngwàlonda Díyì anu menemene. Ki cìdì Nyuma Mwímpè ne cya kwenza ncyôci aci.

BùdiYe naabù mbwà kunùfikisha nwènù balùme ku kutùma mpàlà kwa cyanàànà bwa kubènga kutàngila bakàjì bàdì bavwàle bu bàdì kabàyi bavwàle abu, ne kulekela dibàalakana, ne bidimba bya ekeleeziya. Ki cìdìYe ne cya kwenza ncyôci aci.

¹⁰⁶ BùdiYe naabù mbwà kukulekeesha dinwà dya mfwankà ne maalà, ne kwikala...kujinga kwikala muntu wa mushinga munene. Yèyè neùmushè aci mu wèwè. NeÀkuvwijè mudìpwekèshe paùdì wenza nanku. Ki kabingilà kàà Nyuma Mwímpè nkòkò aku. Ùdì bwa nsòmbelu wa cijila. Ncya bushuwa. Ùkulekeesha bijaanu. Ùkulekeesha kunaya kwa twarta, kunaya kwa mibèlà, ne bintu bikwabo byònsò byùdì wenza mu musokoko ebi.

NeÀkulekèèshè dyenza dyebe dya bintu bya lukutukutu mushindu wùdì ubyènza awu, kùyi ne nsòmbelu wa lulamatu kùdì mukajèèbè to. Ki cyènzaYe ncyôci aci. Ncya bushuwa. NeÀkulekèèshè diswa kusela mukàjì wa bendè. Ncya bushuwa menemene.

Ki cìdìYe ncyôci aci. Ùdì ùkufikisha ku diikala ne nsòmbelu wa cijila. Ki kabingilà kàdì kènza ne Nyuma Mwímpè ikalè Bukolè nkòkò aku, “kutèeka majinga èbè ku bintu bya mu Dyulu,” mùdì Nzambi mwimàne ku...?..meeji a Kilsto munda mwebe. Kwèna mwa kudìpangisha bwa kumòna bintu abi to; paùdì ubitàngila, udi utùma mpàlà kwa cyanàànà. Ncya bushuwa. Ki cìdìYe ne cya kukwenzeja.

¹⁰⁷ Wèwè udi wamba ne: “Ncyèna mwa kucyènza to. Kaa, ncyèna anu mwa kucyènza to.” Cya bushuwa, *wèwè* kwèna mwa kucyènza to.

Kadi Nyuma Mwímpè mmulwe mbwà kiipàcìlà aku. Ki cìdìYe mwenzè. Yèyè mmulwè bwa kukuumushaci, biibidilu byònsò bya kale ne bintu byùdì wenza abi.

Dyamba dya maalu mabì a bakwabo adi, uditàpulula, wamba ne: “Nzambi àbeneshiibwè, mèmè ndi Méthodiste, ncyàkwikala bwalu ne bansantu bàà kale babùnguluki bàà mu malaba abu nansha.” Nyuma Mwímpè mmulwe mbwà kukuumusha bya nanku abi.

¹⁰⁸ “Mèmè ndi Baptiste. Mèmè ndi Presbytérien. Ncyèna mufwànyìnekù kuya kùdì kaamusumbà kàà kale kàà bansantu babùnguluki bàà mu malaba aku to.” Nyuma Mwímpè mmulwè mbwà kukuumusha dyumakana dyònsò adi. Ki cyàkenzàYe. Ùdì ùkusukula mu Mashi; ùkukoma ùkwolola. Ki cìdìYe mulwe bwa kwenza ncyôci aci.

M'Mulwe bwa kukululamija. Yèyè wàkamba ne: “Lulàmijàayi myaba mikònyàngàle.” Ki cìdìYe mulwe bwa

kwenza ncyôci aci; kucyàkaja. “Kupwekesha myaba yidi mibànde muulu; kwenza bwa mikùnà yònsò yimwekè bu ne yidi yija maja bu tukùngùlù twa mikooko, ne mabèji ònsò àdi àtuuta bikàshi, bwebe wèwè.” [Mwanèètù Branham ùdi ùtuutakaja byanza—Muf.] Tunyuunyi tùdi twimba bishìilàngàne. Ngonga ya disànka yidi yidila. Kakwènàkù tubingilà to. Ki cidi Ye mulwe bwa kwenza ncyôci aci. Ki kiipàcilà kàà Nzambi mu kutùmà kwa Nyuma Mwîmpè, bwa wamòna mwa kwenza bintu ebi, bwa wamòna mwa kukwàta mudimu wenda uMulonda.

¹⁰⁹ Mpindyewu ncyèna muswe kunùtapa ku mwoyi to, kadi mvwa munwàmbile ne ndi kaaba aka ne meeji matòoke a matàmbe kwikala a ndòndò. Bwa kubènga kunwònya bizàdi, ku musangu ne ku musangu ndi ntùpikila pa kaaba kampànda; ne kushààla ne Bulelèlè, kadi kushààlapù ne kucivwija mu mushindu wà kaciyi cinwònya bizàdi bya bikolè menemene to.

¹¹⁰ Kadi ndi muswe nnwàmbilèku cintu kampànda. Bible Yéyè wàmba ne mbibì bwa mukàji kukòsayè nsukì yèndè, ne wèwè wamba ne udi ne Nyuma Mwîmpè kadi pashìishe ukòsa nsukì yebe, mèmè’s ndi ndikonka ní udi Nèndè. Kùfikikù munda to; wèwè mufile munda, aci cidi anu cileeja ne kùdi cintu cikwabo cibì kùdi.

¹¹¹ Bible Yéyè wàmba ne mbibì bwa muntu mukàji kuvwàlayè cuntwàlù cya cikùmbànyine muntu mulùme, kadi wèwè uvwàla tintàkanyì twà tunsàlàbeetà ne tùpanù atu pambèlu apa mu njila, nwènù bakàji bakolè aba! Ngeela meeji ne mwànà mukese kaayi mmufwànyineku kwikala yéyè. . . cintu, ùnàya ne twànà twà balùme tukese ne bikwabo. Kadi, tàngilàayi, panùdi—panùdi nwènù bakàji bakolè aba, bàà bidimu dikumi ne bitaanu, dikumi ne bisambombo, dikumi ne mwandamukùlù, too ne ku baakaakù, pambèlu apa mu njila! Pèndè’s Bible mmwambè ne: “Ncinyangu ku mèsù kwa Nzambi,” bwa muntu mukàji kuvwàlayè bintu abi. Kadi wèwè nyawu udi ubivwàla, nansha nanku, kadi wamba mùdi ne Nyuma Mwîmpè? Mèmè’s ntu ndikonka mîngà misangu. Nyuma Mwîmpè’s neàlondè Dîyì dya Nzambi ku dileetà ne ku dileetà.

Kadi muiishi mu cyambilu, udi kàyi ne ngàsà bùngì bukùmbàne bwa kuCiyiisha, mèmè ndi ngeela mpatà bwa ne ùdi Nèndè. Aci’s mbushuwa menemene! Ee, Nyuma Mwîmpè’s ùdikù mbwà nanku.

¹¹² Yéyè ùdikù mbwà kufila dilaabiibwa kùdi muiishi. Ùdikù mbwà kufila cijila kùdi cisumbu aci. Ùdikù mbwà ku kutèeka Ekeleeziya mu bulongàme. Ùdikù mbwà kutwàla bwobùmwe bwa Nyuma. Ùdikù mbwà kutùsanga pàmwè ku Bukolè abu. Ùdikù mbwà kutùsanga pàmwè ku dinanga, dinanga dya bwànà bwetu.

Nansha wèwè Méthodiste, Presbytérien, Luthérien, cyònsò cyùdi aci, pìikalàbi ne twètù bònsò tudi babàtijiibwe ku Nyuma

Mwímpè umwe mu Mubidi wumwe, ne balwè bidimba bya Mubidi wà Yesu Kilisto, kakwèna...kakwèna cintu nansha cimwe cìdiku mpindyewu, cintu nansha cimwe cya matùkù àcìvwavwà; nzala, cìyòòle cya nzala; cintu nansha cimwe kacýèna mwa kutùtápululakù ne dinanga dya Nzambi, dinanga dya Kilisto, “dinanga dya Nzambi didì mu Kilisto” to, bwalu tudi balediibwe ku Nyuma Wendè, basukùdiibwe mu Mashi Èndè. Tudi cìfùkiibwà cìpyacìpyà. Ki cìdì Nzambi mulwe bwa kwenza. Ki kiipàcìlà kàà Nyuma Mwímpè nkòkò aku. Eyowa’s, mukalenge. Ki cyòcì aci.

¹¹³ Mpindyewu, nwènú cisàmbà, ntàngilaayi, mumpàla. Byanza byàbúngì bìvwa byediibwe muulu ne, nudi ne Nyuma Mwímpè; nwamònu’s, cya bushuwa, ki mùvwàbì. Kaa, mpindyewu nèngiikalè—nèngiikalè anu mwa kutontololaku kakese mwaba ewu. Eci cìdì cìkwàciibwa pa mikàbà ya mèyì. Kadi netùkùsàkìdìlè kabidi byàbúngì mààlabà dìlòlò.

Wèwè wamba mùdì Nendè, kadi mwikàle mupiiile ku bintu ebi, ndi ndìkonka ne cìdì cìkulombolà wèwè ncinyì. Nzambi kààdyàkukulombolakù pambèlù pàà Dìyì nansha. Yèyè neàkulamè ne Dìyì, bwalu aci ki mikenji ya Nzambi Sungasunga, ya Ekeleeziya Wendè, bwa cisàmbà Cyèndè, bwa bakàjì, ne bwa balùme.

¹¹⁴ “Ee,” mùdì wèwè wamba, “kabyèna bingenzela mèmè bibì bwa kwenza *cikampànda* anyì *cikansanga* nansha.” Kaciyi cìkwenzela bibì? Dìyì’s dìdì dyàmba ne cìdì cìkwenzela bibì.

Kadi Nyuma Mwímpè Yèyè munda mwebe, Yèyè’s neàkulombòle buludi ku Dìyì. Kakwàkwikalakù tubingilà to. Nzambi kàtu ùtwàla mashintuluka anyì tubingila nansha. Yèyè ùdì ùfùnda cimanyinu ne wèwè ucitùmikila. Kwàjìkì. Ki cìdìku bwa bantu bònso. Nudi nulonda njila umwèumwè awu.

¹¹⁵ Peetèlò wàkamba ne: “Nyingàlàlaayi, yònsò wa kunùdì; nùbatiijìibwè, yònsò wa kunùdì, mu Dìnà dya Yesu Kilisto bwa dilekelediibwa dya mpekaatu yenu, pashiishe nenùpetè kupà kwà Nyuma Mwímpè.” Nwamònu anyì? Ki cyòcì aci. Bìdì bikèngela bwa twètù kulonda njila awu.

¹¹⁶ Mpindyewu ncyèna ne meeji a kunùtapa ku mwoyi nansha; ndi munúnangè bikolè be. Kadi, mwanèètù wa balùme, mwanèètù wa bakàjì, nudikù nufika ku dyumvwa ne, ne... ne ndi mumanyè ne nèngiikalè ne cya kwimana mu matùkù a ndekeelu ku dibìikà dya ku lufù, pàmwè ne lukòngò lwà bantu elu, bwa kulumbulula bwa Dìyì edi anyì? Ne Nyuma Mwímpè ùleeja cyòcì eci, ne mèmè nCìyiisha kuntwaku, kunwìkalà ne cya kwimana aku? Mmunyì munwàbèngà kunyookiibwa bwa bwalu abu? Kwènàku mwa kubènga kunyookiibwa to, mulundà wànyì. Kùcyènjìku to. Mpindyewu imànyika cintu aci. Cyònsò cyùdi wenza cìdì cibì aci, cìmànyìke.

Wèwè udi wamba ne: “Ncyèna mwa kucìimanyika to.”

Nanku kwêna mwanji kwikala ne Udi-mwa-kwimanyika awu munda mwebe to. Pàdi Nyuma Mwîmpè ùlwa, Yèyè ùdi ùkupèèsha Bukolè kumutù kwà maalu a pa buloba. Ne pawikalà . . . Tèèlejà cìdiYe Yèyè mwambe. “Wèwè unanga maalu a pa buloba anyi bintu bya pa buloba, mbwalu dinanga dya Nzambi kadyèna munda mwebe to.” Mpindyewu, kakwènakù tubingilà to. Yèyè ùdi ucìvwija citòòke tòò, ne bìdi bikèngela bwa twètù kufika ku cimanyinu aci.

¹¹⁷ Ndi mumanyè ne nudi nwela meeji ne ndi mubi be. Kadi ndi anu mûle bibi be patùdi twakulangana apa. Nwamònu anyi? Tèèlejàayi. Aci ncilelèlà. Mpindyewu seemènà kùdiYe, mwanèètù wa balùme, mwanèètù wa bakàji.

¹¹⁸ Kùlekedikù cimwe cya ku bilongelu bitùmbùke bya mamanya a mu mitù bìdi muneemu ebi bikwambila ne: “Kaa, abi’s mbintu bya bantu bàà meeji a cyena kale.”

Byòbi ne mbintu bya bantu bàà meeji a cyena kale, nanku Nzambi’s mmuntu wa meeji a cyena kale. Nenku pìikalà Nzambi muntu wa meeji a cyena kale, nanku’s ki cìndi, mèmè pàanyi. Amen. Mèmè ndi muswe kwikala bu Yèyè. Bwa cinyi? Nyuma Wendè ùdi munda mwanyi, mwikàle ne nzala ne nyòòtà, ùbiikila cyònsò cìdi cibèngàngàne ne Dìyi ne . . .

¹¹⁹ Bantu bôbò bàmba ne: “Mbîmpè bwa, kaa, bu muntu mwa kunàya ndambu twarta bwa kuumushakù luteetùkù, ne ùnàyakù anu bwa lufwàlangà lumwe anyi yibidi cyanàànà. S’bìdi anu bîmpè.” Nzambi ùdi wàmba ne kî mbîmpè to.

¹²⁰ “Kaa, bu wèwè kwangatakù anu twalà twîmpè twà mu nsòmbelu etu, ne kukwàcìcakù anu kakese cyanàànà, ku musangu ne ku musangu.”

Kadi Nzambi mmwambe ne: “Dyàkabì dyèndè.”

¹²¹ “Kaa,” mùdi wamba, “s’bìdi anu bîmpè, Mwanèètù Branham. Ndi—ndi—ndi nkòsa nsukì yànyì bwa cintu cya bushuwa. Muntu mukàji, udi mumanyè’s, bakàji bakwabo aba’s bàdi bàcyènza.” Cìdi bakàji bakwabo bènza nansha ciikàle cinyi. Bôbò abu kabèèna cileejilu cyebe anyi kî mbamfumubeebe bàà mudimu nansha. Wèwè ne Nyuma Mwîmpè munda mwebe, neùlondè dileeja Dyèndè dya njila cìdi bantu bàmba bwebe wèwè nansha ciikàle cinyi.

¹²² “Ee, Mwanèètù Branham, kùdi luuyà lukolè be, nenku bikèngela anu mwalè tulàmbà twà *bikampànda* etu.” Iferno’s ùdi ne luuyà lukolè lutàmbe alu, mwanèètù wa bakàji. Lekèlè nkwambilè nanku awu. Nenku—nenku kwidìkijikù to. Úvulukè aci.

¹²³ Ne Nyuma Mwîmpè neàkulombòlè misangu yònsò anu ku Bulelèlè, ne Bulelèlè Bwèndè n’Dìyi. “Dìyi Dyànyì didi Bulelèlè. Dìyi dya muntu yònsò diikalè mashimi, kadi Dyànyì diikalè dilelèlè.”

Kadi anjì elàbi meeji, “cinyangu.” Udikù mufwànyìne kwela meeji anyi?

124 Ewu mmwakù wà bwalu bukolè be bwa mwambi wàmba’s, kadi nkàadi mubwelèbwèle mu nkumba ya myaba yidibi bifwànyìne anu. . . S’mbifwànyìne kukèngela kwalukila pambèlu, s’udi muswe nansha kwalukila, bìvwa mmùmwè ne. . . Ne bintu bya manyaanù ku cimanu. Mèmè kudyàmbidila ne: “Nansha twamba mwine mmunyi mùdiku bantu mwa kwikala bàà ciipanshì mushindu ewu?” Mupùùyà mubolè wèbè wà! Ne pàndì mbwela mu myaba ayi, ntu misangu yàbùngì ndyàmbidila ne: “Mupùùyà mubolè kaayi ewu!” Mvwa mwa. . . Mwômò amu, mvwa mwa kwikala mudikwàte ku dyùlù mushindu ewu, bwa kuseesuka. Mvwa ne bwôwà bwa ne nkwepi kùmvwà mwa kukwàta ku cikwàcìlu cya ku ciibi, cyàkàbidì ne, kùvwa kufwànyìne kwikala twìshì twa màsaamà a màsàsà ne bikwabo. Ki mèmè kudyàmbidila ne: “Kaa!”

125 Dìngà ditùkù, mèmè mwimàne ku cipalu cya ndèkè, wumwe wà ku myaba yínkaadiku mubwelè ayi, anyi ngàlà wa njila ya njanja, mèmè kubwelamù. Ki mèmè kudyàmbidila ne: “Kaa, luse wè!”

126 Ki Cintu kampànda kungambila ne: “S’ki mùdì buloba bùnunka nanku bwa Nzambi. S’ncinyangu.”

127 Mèmè kudyàmbidila, pàndì mmòna muntu mukàjì wènda ùpweka ne mùsèèsù, ùzèleka yèyè yònsò ne ngendu mushindu awu, mwine awu muvwàle bilàmbà bya bantu balùme ne, ki mùdìci cìmwènèka kùdì Nzambi nanku. Ncinyangu, cintu kampànda cya cikooyike ne cìnunka mupùùyà mubolè, kumpàlà kwà Nzambi. Cibì, mukàjì awu neàye mu ekeleeziya mu dyàlumingu, mudilengèje bìmpè.

Nekùye muntu mulùme kampànda mwômò amu, wa ùnwa maalà, wìbila, ne munangè mfranga, ne wìbila kùdì mwena mutumba nendè, ne bikwabo byònsò, bwa kupetakù mfranga ya pamutù; nenku wènza bintu ebi, ne ùnàya manàyì a mfranga, ne ùnwa mfwankà, ne ùnwa maalà, ne ùshima; ki pashìishe ùya mu ekeleeziya ùkafila bujaadiki. Cinyangu! Bukooyà! Awu’s ng’ekeleeziya wa mamanya a mu mitu.

128 Wàmba ne: “Ee, mèmè’s ndi wa mu ekeleeziya.” Eyowa’s, ne bikèngela bwa kupàtulakù beena mu ekeleeziya amu, tusunsa dikumi ne tutaanu, bwa balami ne bakwabo bònsò bàmonèku mwa kunwà mfwankà, ne mpaasàtà pèndè, kumpàlà kwà nwènù kwalukila ne kutùngunuka ne masangìsha. Ngambilaanyaàyaaku mwaba awu! Tàpulukà ne cintu cyònsò cya bukooyà!

129 “Kooyìshaayi mubidi; Mèmè nèngùbùtùlè.” Nzambi ngudi mwambe ne Yèyè neàwùbùtùlè. Nenku leelu ewu, ku dísamà dya kànsèrè, didi dìfila bya pa lukama makumi citeema ne bya mu njila bya lufù, kànsèrè kàà pa muminu ne kàà mu

bisùlùsùlù, mbikèba kùdi dinwà dya mfwankà. “Kooyìshaayi mubidi; Mémè nêngùbùtùlè.” Kadi bàdi mu njila batàngile mu iferno mu mushindu wa dikèma, bènda bàbùnguluka mushindu awu, kabàyi bamanyè to.

Kadi muyiishi kampànda mwimàne mu cyambilu ne màpòlomè anaayi, a mu cilongelu citùmbùke, ùnwa mfwankà, yèyè mwine awu. Lekèlà nkwambilèku cintu kampànda, mwanèètù. Nyuma Mwimpè wàkatùmiibwa mbwà kubiikila balùme ne bakàjì bwa kupàtukabò mu cintu aci. Tàpulukà!

Mwàkù *ekeleziya* mbwena kwamba ne kwikala “mutàpùlùke.” “Pàtukàayi munkaci mwabo,” mùdi Bible mwambè. “Kanùlengi cintu cyabo cibìipe aci to, nenku Mémè nènwnàkidilè; nenku nenwikalè bânà Bàanyi bàà balùme ne bàà bakàjì, ne Nêngìikalè Nzambi kunùdi.” Kaa, ekelekele! Ncyèna ne meeji a kwikala ne lwonji to, kadi ndi muswe kwikala ne meeji matòòke ne kwamba bulelèlà. Eyowa’s, mukalenge. Kaa, cintu kaayi cibi’s wè!

¹³⁰ Balùme ne bakàjì, tudi panshi anyi tudi pa kazubu leelu ewu? Tudi penyi? Twimanyikàayi.

¹³¹ Dilòòlò adi, dyàmwàmwà dya nkwasa mukese wa kale mu cibambalu mwàmwa, (nenku ndi ne cya kwimanyika), nkwasa mukese muleepa wa panshi. Paanyimà pàà mumanè kusambila matùkù asatu anyi anaayi, ki mémè kufika mu kaaba kampànda, ngenda nyùnguluka, ne ndyàmbidila ne: “Éyi Nzambi,” ne mémè kufika mu mushindu wà ncìciyi mmanya cya dyenza to. Mémè kwamba ne: “Nzambi, nyewu tukàadi ku ndekeelu kwa njila. Ne ndi mufikè ku dyumvwa ne ndi mulèngùlùle. Ndi mupetè mabiikila a diya kakùmbulungana, kadi mwikàle mucyòke, ne ncìyi muswe kucyènza to.” Mémè kwela meeji dîbà adi ne mvwa mwa kumòna Mukalenge wanyì wènda ùtetuka mu mîdimà mwàmwa, pàvwàYe mucyòke bikolè mu mushindu wà Kàyikù ne mwa kwambula dikàsà ne kwambula dikwabo to, kadi Kàvwa mutàmbe. . . KwimaYè bwa mukàjì wa ku Nayìnà awu, dîbà adi bwa mwànà wa balùme uvwabò bàya nendè kuntwaku uvwa mufwè awu; too ne mwàkayàYe ne kulenga mushèètè wà bafwè awu, ne kukwàta mudimu ne kaadikàndà kakesèè kàvwà munda Mwèndè aku bwa kajuula mwànà wa balùme awu. “Ee, mémè ndi mufikè ku dicyòka munyi? Mbwalu kaayi ebu naanyi’s, Mukalenge? Ki mémè ewu ukàadi wela meeji ne: ‘Ee, nkàadi ngenda nkùlakaja. Ncyèna—ncyèna mwa kucyènza to.’”

¹³² Kùvwa Mòsà, anu ne Nzambi umwèumwè ùndi mémè nkwàcila mudimu ewu, wàkiimana kuntu kwàka, ne bidimu lukàmà ne makumi abidi.

Kùvwa Kaalèbà, mwimàne ne bidimu makumi citeema, ne mwelè wà mvità mu cyanza, kwambayè ne: “Yoshùwà ngwàkantèeka mwelè wà mvità ewu mu cyanza, kùkaadi bidimu makumi anaayi.” Ùvwa ne bidimu makumi mwandamukùlù

piine apu. Yèyè ne: “Ndi muntu wa bukolè leelu ewu anu mûmvwà mwine musangu awu.” Amen.

Mêmè kwamba ne: “Nzambi, ikàlàku naanyi luse.”

¹³³ Mêmè ne: “Ee, tàngilà kùneeku, ndi misangu yònsò anu . . .” Ki mêmè kukwàta mukàjàanyi (udi paanyimà pààpa wàwa) ku cyanza, ewu dyàmùnù dya ewu dya mwàmwà dya Bible ewu ne wendè Bible mukese awu, mêmè kwamba ne: “Munanga wanyi, nkàadi mulwè wa meeji a lubòko be. Nyuma Mwîmpè nyewu ùmpisha munda mwanyi emu.” Mêmè ne: “Ndi mvùluka nshìndi ayi kuntu kwàka. Ndi mvùluka Hattie Wright kuntwaku, ne bânà bàà balùme bakese abu. Ndi mvùluka bikaadi Nzambi mwenzènze, ùleeja ne Yèyè n’Nzambi, uvwa mwa kufùka awu.” Aleluuyah!

Mêmè kudyàmbidila ne: “Yèyè’s ùkaadi mungambile aci, kùkaadi bidimu ne: ‘Ncyàkukushiya to. Ncyàdyàkukulekelelakù to. Muntu nansha umwe kàakukukàndameenakù to, matùkù èbè ònsò a mwoyi. Mêmè nêngìikalè neebe. Ne kubangila ku dijingulula dya ku cyanza edi, nebikafikè ku ne neùmanyè too ne bwalu busokòmè bwa mu mwoyi. Paanyimà pàà cyòci aci, necitambè kwikala cìbànda anu kubànda.’ Cidimu paanyimà pàà cyòci aci, kujaadikiibwaci anu menemene, buloba bujimà. Mwab’ewu, ki mukwabo mudimu munene wà bwambi wùlwalwà ewu, mucitàmbe kule ne kule.”

Mêmè kwamba ne: “Munanga wanyi, ndi nkukwàta ku cyanza. Ku dikwàcisha dya Nzambi ne ku ngàsà wa Nzambi, kùndekèdìku kabidi ne meeji lubòkò to. Ngèndè nye too ne ku ditàbuluja edi bwa kuyiisha bitàmbe ne kacya kwònsò eku. Nye mwaba ewu, bwa kwanji kudìjidila mêmè mwine, ne kusebeela bakwabo njila; bwa mpekaatu yanyi mêmè mwine ayi, kalèngù kàanyi mêmè mwine aku bìikalè mwinshì mwa Mashì, bwa mapangila àanyi kwikalawù mwinshì mwa Mashì, bwa ngaamònakù mwa kupàtuka ngamba ne: ‘Ndondàayi, nwènù bantu.’” Neya bushuwa.

Ntu ngumvwa bingenza bibi bwa kumòna muntu wàmba ne: “Nda wèwè ùkacyènzè.” Mêmè ntu muswe muntu kampànda wâlombola njila bwa kucyènzà. Eyowa’s, mukalenge.

¹³⁴ Mùneemu emu kùkaadi ntàntà, twàkapeta mudilu mu cimenga emu, Kùmpànyi wa Pfau Oil kukwàtayè mudilu. Kubiikidishabò beena mudimu bàà Dijimà dya Midilu bàà mu Jeffersonville. Kadi mulundà wanyi kampànda, muntu mwîmpè, kacya kàvwakù yèyè mwibidile midilu ya minène mushindu awu to, ùvwa ùnyùnguluka kuntwaku, wàmba ne: “Sòm̀pwelàayi ndambu wa màyi *apa*, balùmyuànà, sòm̀pwelàayi ndambu wa màyi *apa*.”

Ki beena ku Clarksville mukese bàlwalwà bàba ne, “ding, ding, ding, ding,” bàlwa lubilu kuntwaku. Ki kwambayè, mfumu wa midilu ayi ùtùpika panshi, wàmba ne: “Sòm̀pwelàayi

ndambu wa mâyi *apa*. Upùlaayi didìdiishì *edi*. Sòm̄p̄welàayi ndambu wa mâyi *pààpa*.”

¹³⁵ Kadi dyàm̄wàm̄wà dya musùlù kulwakù bajimì bàà midilu balongesha bimpè bàà mu Louisville. Ndòbò munene awu ne cibàndilu kabiyi byanji kwimanyika to mfumu ùkaavwa ku lusongo lwa cibàndilu aci. Pààkabàndà cibàndilu aci, yêyè ùkaavwa kumutù aku. Kukùpayè kasuuyi kèndè kumpàlà kwa kubàndayè, ne kutùùlayè didìdiishì adi, kwambayè ne: “Lwâyaayi, balùmyànà!” Ki bwalu abu’s. Mudilu wùmba wùjìma mu tusunsa tukese.

Kabiyi bya ne: “Sòm̄p̄welàayi ndambu wa *apa*. Sòm̄p̄welàayi ndambu wa mâyi *pààpa*” abi to. S’cidi cinùvùlwijakù, bàm̄wè bàà ku bayiishi bàà mamanya a mu mitù abu’s.

¹³⁶ Lwâyi! Katùyaayi! Mèmè ndi mumanyè ne Cidi Bulelèla. Nkààdikù muteetètèete ne mumònèmòne. Butùmbi’s wè! Nyuma Mwimpè ngwa cya bushuwa. Nzambi mmwimpè. Kanùteeci *apa*, kuteeta *pààpa* to; túbwelàayi munda mwèndè! Yèyè ùdi kaaba aka. Cidi bwènù nwènù. Nzambi mmupèeshe Ekeleeziya Wèndè Bukolè Bwèndè. Kì mbya kusòm̄pwela *cikampànda* apa, ne kusòm̄pwela *pààpa* to; kanwàdyàkwenzakù cintu to. Lombòlaayi dikàsà! Amen. Uh! Yoyöyò! (Ncicyèna mmwèna kabidi mu byòbi to.)

¹³⁷ Amen! Citwikalà mwa kwenza ncinyi? Muntu yònsò udi musòm̄be kaaba aka mmùle tètè ne cintu kampànda.

Pashìishe nengìikalè mwa kwimanyika; bìdi mwa kukèngela bwa mèmè kwimanyika, paanyimà pàà cyòci aci.

Wèwè udi mùle tètè ne cintu kampànda. Kwèna mwa kwikala musòm̄be mwaba awu kùyì mùle tètè ne cintu kampànda to. Udi ne mwoyi kampànda munda mwebe amu. Mwoyi awu ngùdi wùkulombola, ne mwoyi awu wùdi wùlombodiibwa kùdi nyuma kampànda.

Mpindyewu, udi mufwànyine kwikala mùle tètè ne maalu a pa buloba, mwikàle unanga malu a pa buloba anyi bintu bya pa buloba. Nzambi ìkalèku neebe luse.

Udi mufwànyine kwikala mùle tètè ne twitabàayi ya mu ekeleeziya kampànda, tuumasambila tukese kampànda tûtù usambila atu, udyàm̄bidila ne twòtù atu ntwà ditùma kùdi mufwè kampànda, anyi—anyi kudyènza cimanyinu kampànda cya nkùrusè. Nzambi ìkalèku neebe luse.

¹³⁸ Ne udi mufwànyine kwikala mùle tètè ne ntèdeleelu, aci kadi ki citàm̄be bubì. Ncya bushuwa. Ncya bushuwa. Bible mmwambè ne: “Mu matùkù a ndekeelu nebìikalè batèndeleeedi bàà dikèma, bìikàle ne cimwènekelu cya difwànà dya Nzambi; bìikàle ne cimwènekelu cya difwànà dya Nzambi, kadi bàvila Bukolè bwàdi: kùdi bàà nanku umùkà.”

Pawikalà mûle tètè ne ntèdeleelu, udi mwena dikènga; anu ntèdeleelu nkàâyendè, kwàjiki. Pawikalà mûle tètè ne twitabàâyì, kwèna mumanyè cyûdi wamba aci to. Pawikalà mûle tètè ne maalu a pa buloba, udi mpofo.

¹³⁹ Kadi pashiishe, kabidi, udi mufwànyine kwikala mûle tètè ne Nyuma Mwîmpè. Amen. Ndi ntèkemena ne bìdi nanku. Kadi, kùyi nanku to, ndi ntèkemena ne neùjiibwè. Nenku pawikalà mûle tètè ne Nyuma Mwîmpè, cyûdi naaci ncinyi? Udi ne Bukolè. Udi ne dinanga. Udi ne ditalala. “Ndi nnùpa ditalala Dyànyì; Ndi nnùpa, kî mmùdi bàà pa buloba bàpa to.” Udi ne ditalala. Udi mutwîbwe citampì. Udi ne cimanyinu. Amen. Udi ne diikisha. Udi ne disànka dìdi kadiyi kwamba, ne mûle tètè ne butùmbi. Udi mwelè lwongò. Kaa, ekelekele! Ki cyûdi, paùdi ne Nyuma Mwîmpè. Udi ne . . . Wèwè muujiibwe tètè ne Nyuma Mwîmpè: “Udi muumùke ku lufù muyè ku Mwoyi,” mwindile dibìikà dya ku lufù dya bantu bônso mu ditùkù dya ndekeelu.

¹⁴⁰ Mu buloba bùcilwalwà, ku Mukalenge wetù Yesu Kilisto, ne bàdi baMumòne ùlwa mu butùmbi ne mu ngiikàdilù wa ùkèmesha abu: “Mbù neàpatulè bafwè bàdimu.” “Mibidi ya yìbola ya bàdi balààle tulù munda Mwèndè abu neyìikalè. . .”

“Bàdi balààle tulù munda Mwèndè.” Udi ubwela munda Mwèndè munyi? “Ku Nyuma umwe nkutùdi bônso babàtìjiibwe mu Mubidi umwe.”

“Mibidi ya yìbola ya bàdi balààle tulù munda Mwèndè abu neyìshintulukè ne yìvwijiibwa mifwànàngàne ne mubidi Wèndè Yèyè mwine wà butùmbi awu, mùdiYe ne bukolè bwa kuvwija bintu byônso mwinshì mwa bukòntononyi Bwèndè.”

“Mémè kuumvwa Dìyì difùmina mu Dyulu,” mwàkambà Yone, “dingambila ne: ‘Fùnda ne: “Bàà disànka mbafwè bàdi bàfwa mu Mukalenge. . .”’ Neùbwelèmu munyi? “Ku Nyuma umwe nkutùdi babàtìjiibwe mu Mubidi awu.” “ . . . bàdi bàfwa mu Mukalenge kubangila ku mpindyewu; bwalu bôbô mbiikishe ku midimu yabo mikole; ne byenzedi byabo bìdi cya bushuwa bìbàlonda.”’” Hum!

Ki cyàkatùminàYe Nyuma Mwîmpè. Kaa, ditwishiibwa dibènèshiibwe, Yesu ngwanyì mémè! Mémè ndi munda Mwèndè, ne Yèyè ùdi munda mwànyì; Taatì munda Mwèndè, ne Yèyè munda mwa Taatù; ne Taatù munda mwànyì, ne mémè munda Mwèndè.

Yesu ngwanyì mémè!
 Kaa, kààdyosha kaayì kàà butùmbi bwa
 Nzambi’s wè!
 Mémè ndi mupyànyì wa lupàndu, musùmba
 kùdi Nzambi,
 Mulela ku Nyuma Wèndè,
 pàngààkwoweshiibwà mu Mashi Èndè.

Amen. Ncyênàku mufwànyine kucishintakaja to. Kaa, ekelekelele!

Mabwe ônsò a rubies ne a mbongò, ne argent
ne ngòlò,

Mishèètè Yèndè mmyùle tèntè, Yèyè ùdi ne
mabanji àdì kaàyi kwamba.

Bwalu mèmè ndi mwànà wa Mfumu!

Mèmè ndi mwànà wa Mfumu awu!

Pàmwè ne Yesu Musùngidi wanyì,

Cìdi cìmvwija mwànà wa Mfumu awu!

¹⁴¹ Amen ne amen. Ncyênàku mufwànyine kucishintakaja to. Ncyênàku mufwànyine kucishintakaja to. Ncìdi ne mikwabo Mifùnd- . . . yibidi anyì yisatu.

Pashìishe, mukwabo Mufùndù ngwôwò ewu. Paùdi—paùdi muujìbwe tèntè ne Nyuma Mwímpè, byòbì abi ki bintu byùdi naabì. Dìbà adi udi cinyi, kùdì bàà pa buloba? Mwenyi. Ndi mumanyè ne dìbà dikaadi dipite, kadi kí nditambekù kupita bwa eci nansha. Mwenyi! Kaa!

Tudi beena lwendu ne tudi beenyi pànwapa,
Tudi twenda tukèbangana ne cimenga
cìcilwalwà,

Bwàtù bwa disùngila bùlwalwa abidi àdì
panshi aa,

Bwa kukùngwija Mabwe Èndè a mushinga
mukole ne kuya naawù Kumbèlu.

¹⁴² Ndi mwa kuumvwa mùvwà màyi àsùmpuka mu Musùlù wà Ohio mwàmwa, pàncìvwà muyiishi wa kánàkànà, wa bidimu bìpacìla makumi abidi ne bibidi, ngimba musambu awu kuntwaku. Ki mèmè kuumvwa, kutàngila muulu kumutù kwànyì aku, ne kuumvwa Dìyì, dyàmba ne: “Bàndulukà.” Ki Bukènkè bunène abu bùlwalwà ebu bulembèlè anu kuntwaku, bwènda bùpwèka kumutù kwànyì aku, bwàmba ne: “Anu mùvwà Yone Mubàtiiji mutùmìbwe bwà kudyànjidila Dilwa dya kumpàlà dya Kilisto, wèwè newikalè ne Mukenji wàdyànjidilà Dilwa dya Cyàkabidì dya Kilisto.”

Kaa, mvwa mufwànyine kuciitabuujà munyi? Kadi cyàkenzeka anu nanku's. Ne dilòòlò edi tupyà twà matàbuluja ki kuteematù mu nyùngulukilu ne nyùngulukilu wa buloba bujimà eku. Ekeleeziya munene mupikula wa Nzambi mmuDìpàtùle mu mwaba awu, ne tùmpanyè tunènè twa dyondopa, ne bimanyinu, ne maalu a kukèma, ne bishimà, bileeja Dilwa adi.

¹⁴³ Wèwè udi wa ku baabèndè, ne udi mwenyi. Udi wenza bintu byenyi, bishìilàngàne ne byúvwà ne ciibidilu cya kwenza. Kwèna wenza maalu mùvwà ne ciibidilu cya kwenza amu to. Bantu . . . Nyuma Mwímpè, pàdìYe ùlwa pambidi pèèbè, ne wèwè ulwa mùle tèntè ne Nyuma Mwímpè, udi ulèngulula maalu a pa buloba. Udi ulèngulula bintu bivwù kale bifwànyine

kukutuucisha musòdi. Udi ubilèngulula. Dìbà adi udi ulwa cìfùkìibwà cìdì—cìdì cyènza maalu a pabwàwù, kaadibata kabì kumòna, bwàbò bòbò, kaamukankù kakese kàvwà katooyisha mwinshì mu ciswa cya nzòòlo aku; kàmvwà muyiishè ne: *Nènku Pàdì Mukankù Wùsaasulula Diswa Dyàwù* aku. Wèwè udi cìfùkìibwà cya mmwènkelu wa wàcì mushindu, bwàbò bòbò.

Kadi, kaa, ekelekele, ngenda mbànda ne Cibeeba cya Mfumu's! Amen. Kaa, s'n'Cibeeba ciyaaya mu Dyulu. Nenku ndi ngenda mbànda ne Cibeeba cya Mfumu.

Bàmba ne: "Tàngilàayi munsantu mubùnguluki wa mu malaba wàwa, kaadibata kabì kumòna kàka. S'mmuyiishi mubùnguluki wa mu malaba wàwa."

¹⁴⁴ Muyiishi wa ba-Méthodistes mwendè luumù mmwambile muntu kampànda leelu ewu, mu Louisville mwàmwa, wàmba ne: "Ndi muswe kwambulwishakù Mwanètù Billy, kadi udi mumanyè cìndì mufwànyìne kwenza anyì? Mbifwànyìne kukèngela bwa mèmè kudikèbela bilumbù's." Kabyèna bikèngela bwa wèwè kudikèbela bilumbù bwànyì mèmè nansha.

Yèyè's wàkeeyeka mwoyi Wèndè bwa bwàlu bwànyì. Amen! . . . ? . . . Ngenda mbànda anu ne Cibeeba cya Mfumu, kwajiki. Kaa, ekelekele! Muujìbwe tètè ne Nyuma Wèndè! Mulela ku Nyuma Wèndè! Musukula mu Mashi Èndè! Aleluuyah! Wa disànka!

¹⁴⁵ Ne pashiishe cìkwabo cintu, mòna's, cìdì cìkwenzejà nanku ncinyì? Wèwè's ucìdì anu muntu wetù ewu, kadi cìdì cìkwenzejà nanku ncinyì? Mbwalu udi ulwa, wèwè, Nyuma webè mmufùme mu Dyulu. N'Nzambi munda mwebe.

¹⁴⁶ Pàngààkayà ku Loomò, ngàkamòna ne bòbò, muntu ne muntu, bàvwa ne nyuma wa cyena Loomò. Pàngààkayà ku Ngelikà, bònsò bàvwa ne nyuma wa cyena Ngelikà. Ngàakayà ku Angleterre; bàvwa bònsò ne nyuma wa cyena Angleterre. Paùdì uya ku myaba kampànda, udi usangana . . . Pashiishe udi usangana nyuma wa cyena Amerike; mmubi be.

¹⁴⁷ Pàngààkabwelà mu nkità ya mwinshì mwa buloba ya mu San Angelo mu Loomò, bàvwa ne cibayabaya cìfùnda kuulu aku ne: "Bu nwènù mwa kuswa, nwènù bakàjì bàà beena Amerike, ikàlaayikù bavwàle bilàmbà, bwa kuneemeka bafwè." Nyuma wa cyena Amerike's.

Nùbàtàngilaayi pàdìbo bàtùuluka ku ndèkè, ne tulàmbà tukese atu pambìdì, bantu bònsò bàbanga kubàbandila, ki Màndèmwàzelè Amerike ulwàlwa ewu. Ki nyuma wa cyena Amerike nyèyè awu. Wèwè's udi mwa kumanya kùdiye ùfùmina; muvwàle mvwàdilu wa dikèma, balùmyàna wa yàaya, wènda ùpulumunangana ne kabwà kakese kàà kale kàà tuminu ku dyùlù. Cya bushuwa's. Kaa, eyowa, yèyè ùdì . . . Mukàjì awu, yèyè ki Amerike, Màndèmwàzelè Amerike; wènda ùpweka, nùdì bamanyè's, wènda madyùnda mushindu ewu. Bwa cinyì? Ùdì

ne nyuma wa cyena Amerike. Kadi Yesu wàkamba, Ùcìfidila bujaadiki bubì ditùkù adi, Wàmba ne: “Wèwè udi wa panshi pa buloba apa. Mémè ndi wa ku Dyulu.”

Nenku wèwè ne Nyuma wa Kilisto munda mwebe, udi wa ku Dyulu, dîbà adi udi mwenyi pànwapa.

¹⁴⁸ Kadi udi ne ngiikàdìlù wa mwaba wùdi mufùmìne. Ki cìndì mèmè nteeta kwamba. Mwena Loomò ùdi ùlwa mùneemu, ùdi ùdikoonya ku mutù; ne mwena Allemagne ùdi ùlwa mùneemu; mwena Amerike yèyè ùdi ùya kwàka. Bwa cinyi? Nudi ne nyuma ya matungà a kunùdi nufùmìna.

Ki cìdi citùvwijà twètù batàmbe kushìilangana bikolè ne bàà pa buloba. Udi wa ku Dyulu. Udi mulediibwe. Udi—ùdi mwena-mwàbò wa Bukalenge bukwbò. Nudi nuciitabuujà anyi? Ki cìdi Nyuma Mwìmpè nyòci aci, mbwà kukuvwija mwena-mwàbò wa Bukalenge bwa Nzambi.

¹⁴⁹ Dìbà adi, wèwè mwikàle mwena-mwàbò wa Bukalenge bwa Nzambi, Cìdi cikwenzeja maalù mushindu kaayi? Mùdi Nzambi wènza mu Bukalenge Bwèndè’s. Mpindyewu, cìdi Nzambi wènza mu Bukalenge Bwèndè ncinyi? Ncijila, bwakàne, bukezùkè bwa meeji, bukezùkè bwa nyuma; Bukolè ne dinanga, diya dya kùdi bajimìne, dyondopa dya babèèdi, dyenza dya bishimà, dyenza dya bintu binène. Dìbà adi, kùdi bàà pa buloba wèwè udi umwèka bu mupàle, ne bôbò bàdi bàmba ne: “Balùmyànà abu mbajimije lungènyi.” Nwamònu anyi? Kadi wèwè udi mwena-mwàbò wa mu Bukalenge.

¹⁵⁰ Mufùndù mukwbò wumwepele, panwikalà baswè kuwùfùnda, Yone 12.24. Lekèlaayi nnùtèèlèlèwu lùkàsàlùkàsà. Yesu wàkamba ne:

. . .lutete lwa blé lwòlò lumatè mu buloba . . .lwòlò kalùyì lufwè to, kalwèna mwa kupàtula mwoyi mukwbò to.

Mpindyewu, tàngilàayi, dîyi dimwepele dya dyoya naadi mpindyewu. Nenku vùlukàayi, dîbà adi ne, kakùyì mpatà to bìdi . . .Mpindyewu, wenu nwènù, kakùyì mpatà to bìdi bya mushinga munene ne bikèngediibwa, ne bya dyanzejangana ku bukole ne bikèngela anu kwenjiibwaci, bwà ùpetè Nyuma Mwìmpè mpindyewu. Bwalu, kùyì muMupetè to, kwèna mwa kulwa mu dibìikà dya ku lufù to. Mpindyewu tàngilàayi. Nzambi kèna mwa kushipa mikenji Yèndè to. Aci tudi bamanyè. Yèyè ùdi ùlonda mikenji Yèndè.

¹⁵¹ Mpindyewu, lu—lutete lwà blé, anyi ditungù dya ditalà, mutwikalà mwa kudyangata, mùdi Yesu mwambè mwaba awu. Mu bushuwa bwa bwalu, di—ditalà, mu Bible, mwawa anu ncibala lelu ewu, didi dileedila ku linà anyi ku dimiinu dya mushindu kanà wònsò edi, kadi, blé, orge, ditalà, anyi cintu kanà cyònsò, cìdi nditalà. Kadi pàdi lutete lwà blé lùmata mu

buloba, mpindyewu, kùdi . . . Twètù bônso mwab'ewu tukàadi bamòne, bamanyè ne cyôci eci ncitù cyènzekà. Lutete lwà blé, anyi ditungù dya ditalà, didi mwa kwikala ne mmwènekelu mupwàngàne anu ne mwàdi mwônso, kadi paùdi udyèla mu buloba, ne ditalà adi dyôdi . . .

Didi ne mwoyi wà ku musangu ne ku musangu. Nediye mu buloba leelu ewu, didipàtwila mu cicolakola; ne dyàlukila mu buloba, ne dibànda cyàkàbìdi; ne dyàlukila mu buloba. Mmwoyi wà ku musangu ne ku musangu.

Ditalà adi dyôdi kadiyi ne mùtòlokù wà mwoyi munda mwàdi to, nansha dyôdi dimwèka dilenga dya bìshi, kadyàkujuukakù to. Nediye mu buloba ne nedibolè, nenku bwàdi mbutùuke. Citùpà cyàdi, bintu byàdi abi, bàdi mwa kukwàta naabi mudimu bwa kufukisha anyi bikwabo mu buloba. Kadi bwa kwikaladi cyàkàbìdi ne mwoyi, kadyàkwikalakù ne mwoyi to ambà anu dyôdi ne mwoyi wà ku musangu ne ku musangu munda mwàdi. Muntu kanà yònsò ewu mmumanyè aci. Kwèna anu mwa kwikala ne mwoyi to.

¹⁵² Kùdi mwa kwikala bantu babidi, umwe mwikàle anu menemene, bônso babidi bafwànàngàne anu menemene. Umwe wa kùdìbo ùdi mwa kwikala muntu mwímpè, ùdi mwa kwenza byenzedi bimpè, ùdi mwa kwenza bikwabo byònsò; kadi muntu awu yèye kàyi ne Mwoyi wà Cyendeleele munda mwèndè to, kààkujuukakù mu dibìikà dya ku lufù to. Kèna mwa kujuuka to; kakwèna cintu munda amu nansha cimwè bwa kumujuula to. Kakwèna cintu cidiku mwa kumujuula to, kakwèna Mwoyi to. Pa nanku, udi umòna's, wèwè mwanèètù wa balume munanga, wèwè mwanèètù wa bakàjì munanga, muntu yèye kàyi mulediibwe cyàkàbìdi to, nansha bìshi kèna mwa kwalukila ne kubwela mu Bukalenge ebu to. Nansha. "Lutete lwà blé elu lwòlò kalùyì lumatè mu buloba ne lufwè to." Ûvwa wàkula Bwèndè Yèye mwine. Kadi Yèye, kàvwa ne mwoyi wà ku musangu ne ku musangu to, Ûvwa ne Mwoyi wà Cyendeleele; ne Mwoyi wùdiYe mukupèeshe, mbwà wèwè kwikala ne Mwoyi wà mushindu wumwewumwe awu.

¹⁵³ Mpindyewu, wèwè anu ne mwoyi wà buntu nkààyaawù, mukùmbàne anu bwa kwendakana eku ne eku ne kwalakana: "Mukàjì udi musòmbè mu bisànkasanka mmufwè pàdiye ne mwoyi apu," kwèna mwa kujuukakù to. Udi mufwànyine kwikala nsongààkàjì wa mutàmbe kumanyika mu tulaasà, udi mufwànyine kwikala nsongààkàjì wa mutàmbe kumanyika mu manàyì a twarta a mu kasùmbù keenu, udi mufwànyine kwikala mukàjì udi utàmbe kuvwàla bilenga mu ditunga, udi mufwànyine kwikala mutàmbe bulenga, udi mufwànyine kwikala ne mbùngakeenu mutàmbe bwímpè, udi mufwànyine kwikala wa bàkuukwila kùdi bàyeebè, udi mufwànyine kwikala bintu byònsò ebi, bìdi ne, abi mbilenga be, kadi, Mwanèètù wa bakàjì, wèwè kùyì ne Nyuma Mwímpè munda mwebe to, udi

Mwoyi wà Cyendeleele awu, ku ndekeelu kwa njila ewu bwebe mbutùùke.

Ne nansha wêwè ne mmwènekelu kaayi anyì nansha bintu ebi biikàle bìshi, anyì nansha wêwè kùyi mumanyìke anyì mumanyìke, mulenga anyì mubi kwísù bìshi, wêwè ne Mwoyi wà Cyendeleele, *Mwàmwa* newikalè ne mwoyi kashidi ne kashidi.

¹⁵⁴ Piikalà ngondo ne mitooto bimanè kuya, ne buloba budìdilè too ne ku mikùnà ne mu bipèèlà, ne bintu byònsò biikàle ne, kabikàdi ne, kabicìyikù to, ne buloba bütetuka bu muntu mukwàcìke maalà wàlukila kumbèlù kwèndè bufùku, ne mitooto yibènga kukenka, ne yìkùluka mu maulu, ne ngondo mwandàmùke mashi, ne dī—dībà dikwàcìke bundù ne disokòke mpàla, pàamònàbi Mwànà wa muntu ùlwa, wêwè neùkenkè mu bwakànè bwa Yesu Kilisto, bwa kupàtuka mu lukità bu nsòngààkàjì wa citende, mulenga kwísù, bwa kwangata bàyeebè, ne kwikala ne mwoyi kashidi ne kashidi ne kashidi, ne munda mwa bikondo byònsò bya Cyendeleele newikalè wêwè anu ne mwoyi. Ki kiipàcìlà kàà Nyuma Mwîmpè nkòkò aku.

Wêwè muumvwèku kaadikòkiibwa kakese nàka, kùCisàkikù kule to.

¹⁵⁵ Nyuma Mwîmpè ncinyì? Nzambi munda mwebe. Yèyè ùdikù bwa cinyì? Bwa kutùngunuka ne mudimu Wèndè munkacì mwa cisàmbà Cyèndè; bwa kusangisha Ekeleeziya Wèndè pàmwè, bwa kufikisha Ekeleeziya pa kaaba kampànda mu ditùkù edi, kule ne kule kutàmba ba-Luthériens, ba-Méthodistes, ne beena Mpenta, too ne mu mwaba wà ditèekiibwa ne wà ngàsà wa Dyambwibwa. Aci, piikalà citùpà eci cya Ekeleeziya, pààbwelà Nyuma mu Ekeleeziya ewu apa, yèyè neàjuuke anu nàka; ne neàlwe, neàlwe ne bapikula bònsò bàtù balengè Nyuma awu abu.

Ba-Luthériens bònsò bàvwà biimàne kuntu kwàka ne bukènkè bwònsò bùvwàbo naabù abu, mu dibingishiibwa; ba-Méthodistes bàvwà bàdishinda panshi, bàbèèla màyi mwísù, bwa Nyuma uvwa ubàlenga mu dijidiibwa awu; beena Mpenta abu, bàvwà bàbànda bàpweka ne mùsèèsù ne bàbàbiikila ne mbeena “myakulu-too-ne-ku-bisùlùsùlù” abu, ne, kaa, “bakukuminyi,” ne beena “mu myakulu ya byòkosò,” ne byònsò bya nanku awu abi; nebìimanè mu bwakàne, kumpàlà kwa Nzambi mu Ditùkù adi, cya bushuwa anu mùdì Bible ewu musòmbe apa emu. Nwènú nungitabuuja ne ndi musadidi. . . Nutu numbìikila mupròfetà Wèndè; ncitu ndìbiikila mèmè mwine nanku to. Kadi, tèèlejàayi, ndi nnwàmbila mu Dìnà dya Mukalenge. Aba bàdi mu Kilisto Nzambi neàlwe naabò pàmwè Nèndè ku Dilwa Dyèndè, ku dibìikà dya ku lufù, ne anu aba bàdi mu Kilisto nkààyaabò.

¹⁵⁶ Tudi tubwela munda mwa Kilisto bìshi, balùmyàná?

“Ku twitabàayi umwe nkutùdi bônso bakashààlemù” anyi? Bwǎlà.

“Ku dilabulangana òmwè dya ku cyanza nkutùdi bônso bakòkìibwemù” anyi? Bwǎlà.

“Ku màyi àmwè nkutùdi bônso babàtìjìibwemù” anyi? Bwǎlà.

Anyi: “Ku òngumba òmwè nkutùdi bônso bavwijìibwe òngumba” anyi? Bwǎlà.

Kadi: “Ku . . .” Kolìntò wa Kumpàla 12.13: “Ku Nyuma umwe,” Nyuma Mwìmpè, Nyuma wa Nzambi, “nkutùdi bônso . . .” Ba-Méthodistes, ba-Baptistes, ba-Luthériens, ba-Presbytériens: “Endèlaayi mu Bukênkè, bu mùdiYe Yèyè mu Bukênkè, tudi mu bwobumwe muntu ne mukwèndè, ne Mashi a Yesu Kilisto, Mwàna wa Nzambi, àdi àtùkezula ku bubì bwônso.” “Ku Nyuma umwe nkutùdi bônso babàtìjìibwe mu Mubidi wumwe, ne bavwijìibwe baabanyanganyi bàà ngàsà Wendè.”

¹⁵⁷ Kwèna mwa kupìcila ku Cilumbulwidi to. “Ewu udi utèèleja Mèyi Àanyi ne wìtabuuja.” Muntu nansha umwe kèna mwa kwìtabuuja pàdiye kàyi mupetè Nyuma Mwìmpè to. “Ne wìtabuuja Ewu udi muNtùme,” pàdi Nyuma Mwìmpè mujaadike dibìikà Dyèndè dya ku lufù. “Ùdi ne Mwoyi wà Cyendelele, ne kàakupìcila ku cilumbulwidi to, kadi mmuumùke ku lufù muyè ku Mwoyi.” Cinyi? Kwàdyàkulabulakù Cilumbulwidi to. Kwàkwimanakù ku Nkwasa Mutòoke bwa dilumbulwisha to.

Dyebe dilumbulwisha udi udìpetela anu pànwapa. Wapìcidi ku cyebe cilumbulwidi pawàpìci wamba ne, “Ncyèna mwìmpè to, ne dilonga dyanyi kadyèna ne mushinga to. Mukalenge, bwela munda mwanyi, ngangàtèku ùndombòlè, Mukalenge. Cidi buloba bwa mukupa ebu bwàmba nansha ciikàlè cinyi. Ndombòlèku, Mukalenge, ku Nyuma Webè.” Dìbà adi wàlumbùlwishìbù. Dilumbùlwishè wèwè mwine bu mutombòke bwa Kilisto, nenku, mu bwakànè Bwèndè, Ditùkù adi netwìmanè katùyi bàà cifwàkà to mu difwàngana Nendè.

¹⁵⁸ Mushindu anu wumwepele. Munyi? “Ku Nyuma umwe nkutùdi babàtìjìibwe mu Mubidi wumwe.” Nenku pàudi mu Mubidi awu, cilumbulwidi cikaadi cimanè kulumbulwisha Mubidi awu, ne wèwè ukàadi muMwitàbùuje Yèyè bu mulàmbù wà kujìmija naawù mpekaatu webè.

Wèwè udi wamba ne: “S’nkàadi mwenzè aci, Mwanètù Branham.”

Dìbà adi, pìikalàbi ne Nyuma Mwìmpè mmwalùkile mukupèeshe citampì bu cimanyinu, Nyuma awu’s ùdi ùkubweja mu Mubidi wà Kilisto. Udi ukùdimukila njila mukwabo, ne udi cifùkìibwà cipyàcìpyà mu Kilisto Yesu. “Ukàadi muumùke ku

lufù muyè ku Mwoyi. Bintu bya kale mbiyè, ne udi mupyamùpyà mu Kilisto!” Amen!

¹⁵⁹ Kaa, bu wèwè mwa kuswa, lekèlè nkutwishishèku, mwanèètù wa balùme anyi wa bakàji wanyì mwena Kilisto. Ditàbuluja edi kadìkupicìkù to. Udi ne cya kupeta Nyuma Mwimpè. Yèyè ùdi cinyi? Nyuma wa Nzambi. Yèyè ùvwa bwa cinyi? Bwa kukulombola, kukuludika, kukuuja, kukujidila, kukubiikila bwa kupàtuka, bwa ùbwelè mu Ekeleeziya.

Ekeleeziya ncinyi, mwakù *ekeleeziya* mbwena kwamba cinyi? “Babiikidiibwe bwa kupàtuka, batàpùlùke.” Kaa, mushindu mwine wùndi mufwànyine kwangacila diyiisha pa cyòci aci mpindyewu mene’s wè! “Babiikidiibwe bwa kupàtuka, batàpùlùke,” beenyi, kule ne bàà pa buloba, beena lwendu ne beenyi, biikàle tujikula twamba ne katwèna pànwapa ne cimenga cya pa buloba citùdi tujinga kusòmbelamù to. Kaa, ekelekele!

¹⁶⁰ Mùvwà Abraham, ne Izàkà, ne Yakòbò, banji kusòmbela, basòmbèle mu ntentà mu buloba abu amu. Bàvwa bàjikula bàmba mùvwàbo beena lwendu ne beenyi, dimiinu dya mupyànyi, mupyànyi kale wàwa; taatù awu, mupyànyi. Twètù tudi mamiinu àbò bòbò. “Nenku bàvwa bènda bàkèba Cimenga Cìvwà Mwibaki ne Mwenji mwikàle Nzambi.” Amen. Bàvwa bènda bàkèba.

¹⁶¹ Nenku, leelu ewu, dimiinu dyàbò dìcìdi anu dyènda dikèba Cimenga cìcilwalwà, dyàmba ne: “Ncyèna muswe kudikumbajangana ne buloba ebu to. Ncyèna muswe kwikala ne cya dyenza ne buloba ebu to. Ndi muswe, ndi ngenda nkèba Cimenga cìdi ciibaka cya nseke yinaayi ya mwomumwe. Ndi ngenda nkèba Cimenga cìdi ne Mwoyi wà Cyendeleele, mwikalà dìbà kadiyikù dibwela, mwikalà kamùyikù bukùlùkàji, mwikalà kamùyikù kapese kàà cilàmbà cifike cya madilu ku cikwàcìlu cya ku ciibi, anyi lukità ku luseke lwa kakùnà to. Ndi ngenda nkèba Cimenga aci, Cìdi Mwibaki ne Mwenji, mwikàle Nzambi.”

¹⁶² Kùdi mushindu anu wumwepele bwa kucìpeta. “Kùvwa Dibwe dyàkakòshiihwà ku mukùnà awu, kakùyi ku dikwàcìsha dya kùdi byanza to, dyàkabùngulukà pa buloba ne kubùvingutula, ne bwàkalwa mùdi bu blé...anyì bisòte mu cishiipwìlu.” Dibwe adi, Kilisto Yesu awu; Dibwe dya cilèndwishi bwa bàà pa buloba adi, Dibwe dya ditàpangana ku mwoyi, Dibwe dya bàseka, cilèndwishi bwa ekeleeziya; kadi dya mushinga mukolè ne Dibwe dya dikòka byamù bwa mwena kwitabuuja, Dibwe dya ditwishiibwa, Dibwe dya diikisha. Kaa, ekelekele!

Munkacì mwa kwikisha! Mémè ndi mumanye ne ndi muumùke ku lufù muyè ku Mwoyi. Musùkà wànyì wùdi mu diikisha. Kaa! “Lwàyi kùNdi nwènù bònsò bàdi bàkwàta mudimu mukolè ne bambùle majitu, ne Mémè nènnpèeshè

diikisha dya misuùkà yenu.” “Ci—cimanyinu ciikalàbo ne cya kwamba bibi,” mwàkambilàbo Mariya kùdi mu—mupròfeta. Yèyè neikalè cimanyinu, bushuwa, ki ciikalàci. Kadi Yèyè neikalè ditwishiiibwa. Neikalè dinanga. Neikalè disànkishiibwa. Neciikalè cintu cya umanya ne udi muumùke ku lufù muyè ku Mwoyi.

¹⁶³ Wèwè mwanèètù wa balùme, wèwè mwanèètù wa bakàji; mèmè bu mwanèènù wa balùme, bu musadidi wenù mu Kilisto, lekèlè nkuswishishèku, ne mwoyi wànyi wònsò. Kùlekedikù eci cikupicila pamutù, anyi ku luseke, anyi mwinshi mwebe to. Cyàkidilè mu mwoyi wèbè, nenku newikalè muntu wa dyàkalenga pa buloba.

Ncyèna nkulaya ne neùpetè mùliyò wà ndola nansha. To, mukalenge. Mwanèètù Leo, ngeela meeji ne kùdi byàbùngi bya bu nanku menemene bidì bilayiiibwe mpindyewu ne, “miliyò ya ndola,” bintu bidì bantu bashiilèshiiilàngàne bambè. “Wèwè mushààle mwena Kilisto, udi mufwànyine kupeta mùliyò wà ndola ne newikalè mutu mubanji.” Mèmè ncyèna nkulaya cintu nansha cimwe to.

Cìndi mèmè nkulaya ncyòci eci, cintu cimwepele cìndi mwa kukulaya: Lupàndù lwà kùdiYe. Ngàsà Wendè mmukumbàne bwa diteeta dyònsò. Bantu bàà ku Mpenta abu, kabàvwa nansha baswè biine bivwàbo naabi abi to. Mpindyewu udi wakula bwa beena tètè mu nzubu tètè pambèlu anyi? Bòbò kabàvwa baswè biine bivwàbo naabi abi to, Mwanèètù wa bakàji Angie.

¹⁶⁴ Ndi njingakù ngaanùumvwa wèwè ne Gertie nwimba, dimwe dya ku matùkù aa, (Ùdi penyì?), *Lumingu Lwà Dyalukila Kumbèlu*, dimwe dya ku matùkù aa. Bààbùngi bàà kùdìbo bàkaadi bayè dyàmwàmwà dya mukàlu kubangila anu piine apu. Kaa, ekelekele!

Kabàvwa bàlòmba bintu binène to. Kabàvwa bàlòmba mfrangà to. Mòna’s, Peetèlò wàkamba ne: “Nì ng’argent nì nngòlò mèmè ncyèna naabi to, kadi cìndi naaci, nènkupèèshèci.”

Nenku cyòci aci ncìndi ngamba dilòlò edi, nwènù balundà bàanyi. Disànka, dinanga, ditwishiiibwa, bìndi naabi bya kùdi Kilisto ne dibiiikà Dyèndè dya ku lufù abi, bìndi naabi abi, ki bìndi nnùpèèsha; ndi nnùpèèshabi, nwènù bu bàna bàà Nzambi.

Nenku lwà ùshaalè ku nkùrusè piikalàbi ne Nzambi mmukubiiikile, ne kùjuuku to. Pawàlwà màlabà dilòlò, ùlwe anyi bwa kubwela mùneemu ne kushààla too ne pàjikàku, anyi udi ulwa bwa tùsambilè tùkutentèkèlè byanza. Ndàayi. . . Aci ndiyi ditùma dya Bible, kubàtentekela byanza bwa Nyuma Mwímpè. Ne pashiiishe netuyè, newàlukilè kwebe kumbèlu. . . Wèwè mushààle anu mwaba awu, wèwè mushààle bufùkù bujimà, ushààla ditùkù didi dilondà, ushààla ditùkù didi dilondà, ushààla mu diikisha dijimà, ushààla too ne ku ditùkù

dya kumpàlà dya cidimu, ne utùngunuka ne kushààla, shààla too ne.

¹⁶⁵ Mbwà ne, cyònsò citùdì tufidila dileeja dya njila bwa mààlabà dilòòlò, tunùleeja mu Bible cidi ne cya kulwa, necilwe. Nenku pààlwàYe, dìbà adi kakwènakù baadémons bùngì bukùmbàne mu dikengesha. . . Udi mumanyè ne wàmányì kuumuka ku lufù wàyi ku Mwoyi. Udi cifùkìibwà cipyacipyà mu Yesu Kilisto. Tungonga twà disànka twà mu Dyulu netùdilè.

¹⁶⁶ Mwanèètù Othal, ndi nkwambila ne, cidi cikulàkusha anu kapyà. Nsongààlùmè mukolè nyèyè ewu musòmbe kaaba aka, mwanèètù wanyì mukolè, uvwa kànkè wa wènda ne bingoma bipàyika ku luseke, wènda ùkèba muntu mu ditumba, muntu kampànda wa kutaayishayè bwongò. Kadi cyàkenzekà ncinyi? Dìngà ditùkù kutàngilayè ne kwitabuujayè bwa Mwoyi. Ki kutùngunukayè ne kuya. Kulondayè masangisha àànyì. Nenku mukwàcikwètù awu, kàyi ne biine byàkudyà bya nsongo to, ùdyàdija ne ùlààla mu bisuku ku luseke lwà ntentà, ne nzala ne nyòòtà. Ki dīngà ditùkù Nyuma Mwimpè kulwaYè. Kaa, mwanèètù wanyì, e kukushintululaci's, kī mmwômò anyi? Kutwàlaci Mwoyi, ne kuumushaci lufù. Lukìnu kuumukalù, ne dinanga kubweladi. Kaa, ekelekele! Lukunà ne makòkyanganyi byònsò byumba byàngata cimwangì; Mwoyi mupyamùpyà kubwela.

Tàngilààyi mwab'ewu bakwabo kuvudija ku bakwabo, bakwabo kuvudija ku bakwabo, kwònsò kwàka. Kaa, tungonga twà disànkà twà mu Dyulu tùdila! Balundà bàànyì, kakwèna mushindu wà mèmè kubyàmba to.

¹⁶⁷ Tèèlejèàayi, bwa ngaamònakù mwa kulekela cyôcì eci, piikalàbi ne nudi biitàbùùje bujaadiki bwànyì, mèmè bu musadidi wa Kilisto, ne muteetè bwa kunùleejila mu Bible wa Nzambi ne ncyà bushuwa. Kadi mèyi àànyì pa bwalu ebu ôwò ùmvwika bu ne mmafwànyine kwikala makolè ndambu bwa kuùmvwa, tàngilààyi fòtò wàwa mu maalu a mamanya. Tàngilààyi mamuma, àdì Dikunji dya Kapyà dyàkalombolà bàna bàà Izaleela edi, tàngilààyi nùmonè mamuma àdìDi dikwàma. Mònaayi cidiDi dyènza, cidiDi dyàmba.

Udi wakula awu kī mmèmè to; n'Yèyè udi wakwila kùdì, nudi numòna's. Udi umòna cikèèna-kumòna kī mmèmè to; n'Yèyè udi wakwila kùdì. Udi wondopa babèèdì kī mmèmè to; Yèyè udi munda mwebe, ngudi wondopa babèèdì. Kī mmèmè udi uyiisha to; mèmè ndi muntu mutulùmùke udi udicìina, ne ùnyeema meeji miine, kadi Yèyè ngudi wakwila kùndì. Mèmè ncyèna mumanyè Dìyi to; kadi Yèyè ngudi muDimanyè. Ki mùdìbi. Ki mùdìbi. Ki mùdìbi nanku.

Nenku's ki Yèyè wàwa. Ne Mwanjelo umwèumwè wa Nzambi awu ùdi kaaba aka mene mu citanda emu dilòòlò edi. Kaa, mushindu mwine wùndi mèmè ewu muMunangè's wè!

168 Mpindyewu mbanganyi bàdi baswe kupeta Nyuma Mwïmpè? Tùkenkètaayi nsòmbelu yetu. Mbanganyi bàdiku kabàyi banjì kuMupeta, kadi baswè kuMupeta? Ela cyanza muulu, wamba ne: “Mwanèètù Branham, mu ndòndò wa mwoyi wànyì, ndi muswe kupeta Nyuma Mwïmpè.” Nzambi ànùbènèshè, myaba yònsò.

169 Mbanganyi bàà kunùdì bàkaadi baMupetè, ne baswè kuya mwàkenzàbo mu Byenzedi 4, bàmba ne: “Éyì Mukalenge, Éyì Mukalenge, olòlàku cyanza Cyebe bwa kwondopa, ne kuleeja bimanyinu ne maalu a kukèma mu Dîna dya Mwan’Èbè wa cijila Yesu, ne mpèèshèku bukitù bwònsò ne dinanga, bwa kwakula, ne dyujiibwa dipyadiyà”? Eyowa, cyànyì ncyòci eci, mèmè pàànyì. Nzambi, Mumpèèshèku.

Twinyikàayi mitù, mu meeji matòokè matàmbe kwikala a ndòndò, muntu ne muntu mulamine dijinga dyèndè mu mwoyi wèndè.

170 Mukalenge Yesu, nyewu twoya didikùngwija dikese edi dilòdòlò edi, paanyimà pàà bwobùmwe bwa banyùngulùkile Dîyì ne Nyuma Mwïmpè. Mushindu mwine wätübèneshiYè ne wätwicikijidìYe maanyì a Dîyì Dyèndè mu myoyi yetu’s! Kùdi bambi, kùdi bantu kaaba aka bàvwà bàà bipidì byònsò bya nsòmbelu, bàdi balabùle ne bamòne ne Mukalenge mmwïmpè. Twàmanyì mpindyewu cìdì Nyuma Mwïmpè, mulayi wà Nzambi. Yèyè ùdì Mwoyi wà Cyendelele kùdi bàdi bìitabuujà mu búngì bwònsò.

171 Kabidi tudi bamanyè ne Nyuma Mwïmpè ùvwa Nyuma wa Yesu Kilisto wàkatùmiibwa, ne Yèyè ùdì munda mwetu leelu ewu. Bu mùvwà Nzambi kumutù kwetu, mu Dikunji dya Kapyà adi; pashiishe kwendaYè neetu, mu . . . mubidi wàkabìikidibà ne *Èmanuùwèlè*, “Nzambi neetu”; ne mpindyewu Ùdì munda mwetu, ku Nyuma Mwïmpè, Nzambi munda mwetu. Kaa!

Yesu wàkamba ne: “Mu ditùkù adi nenùmanyè ne Mèmè ndi munda mwa Taatù, ne nwènù nudi munda Mwànyì, ne Mèmè ndi munda mwenu. Nenùcyùmwe mu ditùkù adi. Bwalu, nudi mu buloba bwa mîdimà, mutùdì mwa kwamba, mpindyewu, kadi mu ditùkù adi nenùmvwè.”

172 Taatù, kî ncifwànyine kuvwijiibwa citòoke tòò ne cipwàngàne to, bwalu bìikala nanku katwènakù bafwànyine kwikala ne cintu nansha cimwe cya kwikadilakù ne diitabuuja to. Kadi byenzedi byònsò bya Nzambi mbilombòdiibwe kùdi diitabuuja. Nenku ku diitabuuja mu Dîyì Dyebe, mu cileeji cya Nyuma Mwïmpè utùdì bamanyè ne ngudikù mpindyewu awu, ndi ndòmbakù bwa musùkà ne musùkà wònsò wùdì ne nzala mwab’ewu wùjiibwè ne Nyum Mwïmpè. Aba bàdi kabàyi Nendè abu, kadi biikàle Nendè ne nzala, bàvulukè anu. . . Tudi bafwànyine kubàmbila, Mukalenge, muWàkambà nunku ne: “Nudi bàà dyàkalenga panùdì ne nzala ne nyòòtà. Nenùujiibwè.” Aci’s mmulayi. Ne bidì mene dyàkalenga bwa kwikala ne nzala.

Nudi bàà dyakalenga pa kumanyakù anu mene ne Nzambi wākùlù neenu, bwalu nCyambè ne: “Muntu nansha umwe kèna mwa kulwa kùNdi pàdì Taatù Wanyì kàyi mumukòke dyàmbedi nansha.”

¹⁷³ Nenku, Mukalenge, aba bàdi bankòlomù bàà kale kaaba aka, nyewu beelè byanza muulu. Nyewu ndi mwelè cyànyì pàànyì. Èyì Mukalenge, tùpèèshèku dikàndà, tùpèèshèku Bukolè bwa kwolola cyanza cya Mwan'Èbè wa cijila Yesu, bwa bimanyinu ne maalu a kukèma kwenjiibwabi, bwa kwikalaci mudimu wà bwambi mutàmbe kwikala wà ndòndò, cintu citàmbe bunene cidi kacya kaciyikù cyanji kwenzeka to. Tùpèèshèku bukitù ne dinanga, bwa kwakula ne bantu. Enzàku nanku, Mukalenge. Ikàlàku neetu mu maalu ònsò, tudi tulòmba mu Dìna dya Yesu.

¹⁷⁴ Nenku mààlabà dilòlò, Mukalenge, swàku bwa kùlwe cipeepèlè cicolè cya civuma, cimatè mu citanda eci, bwa kwikalaci anu bu dikwabo Ditùkù dya Mpenta. Cishìmikidi cyàmanyì kutèekiibwa. Byònsò bidi pabwipi. Ngombe yàshebèyìibù, twànà twà ngombe twà maanyì twàshebèyìibù, bimpàngà bya mikooko byàshebèyìibù; mèèsà àdijiibù, babiikila bábìikidiibu. Èyì Mukalenge, tùmakù cibilù cya disànkà cya Mpenta, mààlabà dilòlò, mu citanda eci, ne ujàku musùukà ne musùukà wònsò ne dibàtiiza dya Nyuma Mwîmpè. Enzàku nanku, Taatù. Tudi tulòmba nùnkù mu Dìna dya Yesu. Amen.

Netùyiilè bintu byàbúngì,
 Netwikalè ne lunkòmbè lùdi lwenza ne ngòlò,
 Pàmwàpa ne nshinga cinunu;
 Netwimbè misambu twela mbilà tujà maja
 twenda tunyùnguluka,
 Mwànà wa mùkòòkò neàtùkàmishè binsònji;
 Netwikalè ne lumingu lumwèpelè lwà
 dyalukila kumbèlu,
 Bidimu binunu dikumi bya kumpàla abi.
 (Amen!)

Mashi a mushinga mukolè a Mwànà wa
 Nzambi Sungasunga mmasukùle ne majidile
 Cisàmbà cya cikèmesha bwa Dìna Dyèndè ne
 bàdi bábìikidiibwa ne m'Mukàji-musèla.
 Nansha balèngùlùdiibwe ne bapeetùdiibwe
 pànwapa, dîngà ditùkù Mukalenge neàye ne
 Basungula abu munda mwà ciibi cyà lupangu,
 ne cyôci aci ki cidi ne mushinga kutàmbe
 byònsò.



NYUMÀ MWÌMPÈ WÀKAFÌDIIBWA BWA CINYÌ? LUA59-1217
(What Was The Holy Ghost Given For?)

DILONDANGANA DYÀ MALONGESHA PA NYUMÀ MWÌMPÈ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diinâyì dilòlò, mu matùkù 17 a ngondo wa dikumi ne mwibìdì, cidimu cya 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org